

1 CORINTIOS

Saludo

1 ¹Núa Pablo, nutànàacué pirí cuyàluta. Dios idéca imáidaca núa nuíbaidacatená Jesucristo irípiná iyúwa apóstol, Jesucristo ibànùacatená núa càide iyúwa Dios iwàwáaná nucàlidacatená Jesucristo iináwaná ìwali wenàiwicanái irí. Yái wéenasàiri Sóstenes yeebáidéerica Jesucristo itàacái ìyaca nacái núapicha cháí. Yá Sóstenes itànàacuéca pirí núapichani, yái cuyàlutaca. ²Nutànàacué pirí cuyàluta píacué Dios yàasu wenàiwica yeebáidéeyéica Jesucristo itàacái, ìyéeyéica Corinto ìyacàlená irícu. Peebáidacáinácué Cristo Jesús itàacái, íná pìyacuéca abédanamata Cristo Jesús yáapicha, yá nacái Dios idéca masacàaca imànicuéca píiwitáise yàasunáicaténácué pía, ìibaidéeyéipiná abéerita Dios irípiná. Dios idéca imáidacuéca pía yàasunáipináwa, náapicha macáita wenàiwica isutéeyéica yáawawa Wáiwacali Jesucristo ícha macái cáli ínata, yái Wáiwacali, Náiwacali nacái. ³Nusutácué Wáaniri Dios ícha pirípiná, Wáiwacali Jesucristo nacái namàníinápinácué pirí cayábéeri mawèníiri iyú manuísíwata, namàacáanápinácué pìyaca matuíbanáiri iyú.

Bendiciones por medio de Cristo

⁴Nùaca cayábéeri Dios irí pìwalicué mamáalàacata Dioscáiná idéca imànicuéca pirí cayábéeri mawèníiri iyú Cristo Jesús ìwalíise, yái pìyéericuéca abédanamata yáapicha. ⁵Pìyacáinácué abédanamata Cristo Jesús yáapicha, íná Dios idéca càasuca imànicuéca pía madécaná chàinisi chènuníiséeri iyú. Iná yéewa píalimácué picàlidaca Cristo iináwaná ìwali cayábéeri iyú. Píalíacué nacáíwa cayába ìwali yái tàacáisi báisíirica. ⁶Càita peebáidacuéca tàì íiméeri iyú yái tàacáisi

icàlidéerica Cristo iináwaná ìwali. Peebáidacuéca Cristo itàacái, íná yéewa pìyacuéca siùcade machacàníri iyú Dios iicápiná. Càita píasáidacuéca báisíiricani, yái tàacáisica. ⁷Iná canáta pimáapuèricuéca chàinisica quiríta Dios néeséeri idècunitàacá picùacuéca Wáiwacali Jesucristo yàanàaca àniwa. ⁸Yá Dios ichàiniadapínacué piwàwawa peebáidacaténacué itàacái àta èeri imáalàacatalépinátawa yéewanápiná canáta yéewanacué nacháawàaca pía Wáiwacali Jesucristo yàanàacaalí àniwa. ⁹Dios imàni càiripínáta càide iyúwa icàlidáaná. Yá idéca imáidacuéca pía yàasu wenàiwicapínáwa pìyacaténacué abédanamata Dios Iiri yáapicha, yái Wáiwacali Jesucristoca.

Divisiones en la iglesia

¹⁰Píacué nuénánáica, nusutacué pícha manuísíwata Wáiwacali Jesucristo ípidená ìwali yàasu wenàiwicacáinacué pía, abédamacuécú pimànica píiwitáisewa; picácué quirínama piseríaca píchawáaca. Abédamacuécú píiwitáise canánama píapichawáaca, abéeri íiwitáisesi iyúta. ¹¹Càicuéca núumaca pirí, píacué nuénánáica, níacáiná Cloé uénánái nacàlidaca nulíni picuísáyacáanásacuéwa pìyaca. ¹²Nuémíacuéca piináwaná ìwali abénaméeyéi péená íimaca: “Núacata Pablo yéewáidacalé píchacué”; áibanái nacái íima: “Núacata Apolos yéewáidacalé píchacué”; càita nacái áibanái náimaca: “Núacata Pedro yéewáidacalé píchacué”; áibanái nacái íima: “Núacata Cristo yéewáidacalé píchacué”, càì náimaca. ¹³Quéwa abéericata yái Cristoca, càníirita wáalimá waseríacani, wíacáiná yeebáidéeyéica Cristo itàacái, càica wíade iyúwa Cristo iiná ìyéerica cháí èeri írìcu. Canáca yéewaná waseríaca Cristo iiná. Iná báawéeriquéi piseríanacuéca píchawáaca. Núa nacái, Pablo, càmitaté nuétáwa píchawalínacué pibáyawaná ìwalíise. Càmitatécué nacái pibautizáwa nuípidená ìwali. Iná báawéeriquéi picàlidáanácuéca pìwaliwáaca nuéwáidacalécúca pía áibanái íicha yeebáidéeyéica Jesucristo itàacái. ¹⁴¡Núaca Dios írì cayábéeri canácáinaté nubautizéerica péenacuéca, ipíchanacué píimaca pìwaliwa nuéwáidacalécúca pía áibanái íicha! Níawamita Crispo, Gayo, níái nubautizéeyéicaté nùyacaalítécúca píapicha. ¹⁵Iná caná yéewaná náimaca nabautizáanásawa nuípidená ìwali. ¹⁶Quéwa nubautizacaté nacái Estéfanos yéenanái, quéwa càmita núalimá nuwàwalica asáísí nubautizácaalíté áibanái. ¹⁷Càmíicáinaté Cristo ibànùacué núa pìyacàle néré nubautizáanápíná madécaná wenàiwica. Néese Cristo idéca ibànùaca núa nucàlidacaténá wenàiwicanái

írini Cristo iwàwa iwasàaca nía Dios yàasu yùuwichàacáisi ícha. Quéwa càmita nucàlida cayábanaméeri tàacáisi iyúni càide iyúwa casímáiná èeri mìnanáí yéemiaca càmiíyéica yeebáida Dios itàacái. Càmita nuwàwa nucàlidacani èeri mìnanáí yáalíacái iyú, ipíchanácué wenàiwicanáí iimáichaca abéerita yái Cristo yéetáanácawa iwasàaca wía Dios yàasu yùuwichàacáisi ícha, yái Cristo yéetéericatéwa cruz ìwali wáichawalíná.

Cristo, poder y sabiduría de Dios

¹⁸Wacàlidaca wèepunícawa yái tàacáisica: Cristo yéetácatéwa wáichawalíná cruz ìwali, íná yéewa yáalimá iwasàaca wía Dios yàasu yùuwichàacáisi ícha. Aibanáí yèeyéipinácawa infierno iriculé néemiacaalí yái tàacáisica, yá naicácani iyúwa máiwitáiséeyéi itàacái, náimaca càmitasa yéewa cáiwitáiséeyéi yeebáidacani. Quéwa wía Cristo iwasèeyéipiná Dios yàasu yùuwichàacáisi ícha, wéemiaca cáalíacáiri iyúni, yái tàacáisica, wáalíacáináwa weebáidacaalí yái tàacáisi Cristo ìwali, yásí Dios iwàlisàidaca wáiwitáise cayábéeri iyú íiwitáise cachàiníri iyúwa. ¹⁹Càité nacái profeta itànàaca Dios itàacái. Dios ímacaté:

“Yá numáalàidapiná náicha náalíacái, níái íináidéeyéicawa cáalíacáica nuícha nía, cayábéeyéi nacái iicáca èeri mìnanáí yáalíacái. Càipiná nacái núsáidaca càmita báisi náalíacawa”,

íimaca yái Diosca.

²⁰Iná canáca iwèni meedá yái náalíacáica, níái èeri mìnanáí càmiíyéica yeebáida Dios, éwita nánáidacáanítawa cáalíacáica nía, néewáida nacái áibanáí, náalíá nacái nataánica èeri yàasu wawàsi ìwali. ¡Dios idéca yásáidaca canáca iwèni meedá yái èeri mìnanáí yáalíacáica càmiíyéica yeebáida Dios! ²¹Máiní cáalíacáica Dios áibanáí ícha canánama. Dios íináidacatéwa càmínápináté imàaca èeri mìnanáí yáalíacawa ìwali náalíacái iyúwa. Néese Dios íináidacatéwa iwasàanápináté wía yàasu yùuwichàacáisi íchawa, ìwaliise yái weebáidáanáca tàacáisi ímérica Cristo yéetácatéwa wáichawalíná cruz ìwali. Aibanáí èeri mìnanáí càmiíyéica yeebáida Cristo, caná iwèni naicáca yái tàacáisica.

²²Abénaméeyéi judío náimaca neebáidáanápinása Cristo itàacái naicácaalí wamànica áiba wawàsi càmíríca wenàiwica idé imànica wáasáidacaténá wadèniaca Dios ichàini chènuníiséeri. Nía nacái

càmíiyéica judío, caná iwèni naicáca yái tàacáisica càmicáiná iya abédanamata náaliacái yáapicha, yái èeri mìnanáí yáaliacáica. ²³Quéwa wacálidaca yái tàacáisica: Yái Jesucristoca, yácata Mesías, Dios ibànuèricaté icùacaténaté judiónái. Néese yái Mesíasca yéetácatéwa wáichawalíná cruz ìwali. Judiónái yéemiacaalí yái tàacáisica, càmita nawàwa neebáidacani. Nía nacái cà míiyéica judío néemiacaalí yái tàacáisica, yá caná iwèni naicácani iyúwa máiwitáiséeyéi itàacái. ²⁴Quéwa wía Dios imáidéeyéica yàasunáipináwa, judíocaalí wía, càita nacái càmicaalí judío wía, weebáidaca yái Mesíasca, íipidenéerica Cristo, yéetéericatéwa cruz ìwali, wáaliacáináwa Cristo idèniaca Dios ichàini manuíri, idènià nacái Dios yáaliacái iwasàcaténá wía Dios yàasu yùuwichàacáisi íicha. ²⁵Dios ibànùacaalíté Cristo yéetácaténáwa wáichawalíná, yáté caná iwèni èeri mìnanáí iicáca yái Dios imànírira, quéwa Dios imànicaté máiní cáaliacáiri iyú macái èeri mìnanáí yáaliacái íicha. Naicácaté Cristo iyúwa machawàaquéeri wenàiwica, yéetácáináatéwa máiní báawéeri iyú cruz ìwali, quéwa wáaliacawa Cristo yáasáidacaté iyaca walí Dios ichàini máiníri manuíca macái èeri mìnanáí ichàini íicha. ²⁶Píacué nuénánáica, iwàwacutácué piwàwalica Dios imáidacatécué pía yàasunáipináwa nàyacaalítécué pèewi máisibáwanáita cáaliacáiri èeri mìnanáí íiwitáise iyú, máisibáwanái péenácué nacái ichùulièyéicaté áibanái wenàiwica, càitacué nacái pisèenáimi càmitaté máiní càasuca nía, càmita nacái máiní cachàinica nía cháí èeri iricu. ²⁷Aibanái èeri mìnanáí cà míiyéi yeebáida Dios naicácuéca pía iyúwa máiwitáiséeyéi, quéwa Dios yeedácatécué pía yàasunáipináwa ibáiniadacaténá wenàiwica íináidéeyéicawa cáaliacáica nía áibanái íicha canánama. Càita nacái èeri mìnanáí iicácuéca pía iyúwa machawàaquéeyéi, quéwa Dios yeedácatécué pía yàasunáipináwa ibáiniadacaténá wenàiwica cachàiníiyéica iicáca yáawawa. ²⁸Dios yeedácatécué pía yàasunáipináwa, píacué áibanái iiquéeyéica iyúwa báawéeyéica meedá, iyúwa canéeyéica iwèni nacái, iyúwa cà míiyéica máiní cachàini cháí èeri iricu, iyúwa wawàsi cà míirica iya. Càita Dios yeedácatécué pía yáasáidacaténá caná iwèni iicáca èeri mìnanáí ichàini, cawinácaalí cáimacáiyéica iicáca yáawawa áibanái íicha canánama. ²⁹Iná canáca yéewaná cachàinica wenàiwica iicáca yáawawa Dios yàacuéseimi, ibatàa abéeripiná. ³⁰Quéwa Dios idéca imàacacué pìyaca abédanamata Cristo Jesús yáapicha. Dios imàaca nacái Cristo yáasáidaca walí Dios íiwitáise cáaliacáiri. Dios nacái mabáyawanáca iicáca wía ìwaliise yái Cristo yéetáanácawa wáichawalíná. Cristo

nacái masacàaca imànica wáiwitáise wabáyawaná ícha yéewacaténá wáibaidaca abéerita Dios irípiná, iwasàaca nacái wía Dios yàasu yùuwichàacáisi ícha. ³¹Iná canáca yéewaná cachàinica waicáca wíawawa. Càité profeta itànàaca Dios itàacái ímérica: “Picá picàlida piináwaná ìwaliwa máinicasa cayábérica pía áibanái iicáténá pía cáimiétaquéeri iyú; néese picàlida Wáiwacali iináwaná ìwali, macáita yái cayábérica Wáiwacali imànírira pirí, yéewacaténá áibanái iicáca Wáiwacali cáimiétaquéeri iyú”, ímaca yái Dios itàacáica.

El mensaje de Cristo crucificado

2 ¹Quéwacué nuénánái bàaluité nùanàacaalítécué pìatalé, nucàlidacatécué pirí yái tàacáisi Dios ibèericaté wenàiwicanái ícha; siücáisede Dios imàacaca wacàlidacuéca piríni, ímérica Jesucristo iwasàaca wenàiwica Dios yàasu yùuwichàacáisi ícha. Càmitaté nucàlidacué piríni càulenéeri tàacáisi iyú, càmita iyú nacái yái èeri mìnánái yáalíacáica càmiyéica yeebáida Dios. ²Néseté nùyacaalítécué píapicha, yáté nuínáidacawa nucàlidáanápínacué pirí abéerita Jesucristo iináwaná ìwali, abéerita yái tàacáisi ímérica Jesucristo yéetátéwa cruz ìwali wáichawalíná, iwasàacaténá wía Dios yàasu yùuwichàacáisi ícha. ³Càmitaté nucàlidacué piríni nuchàini iyúwa nùalíacáinatéwa nuwàwacutáca Dios iyúudàaca núa. Nutatátéwa nualùniwa Dios iicá máinicáinaté nuwàwaca numànica macáita càide iyúwaté Dios ichùulianá núa. ⁴Nutàanícaalíté píapichacué, nucàlidacaalíté nacái pirí yái tàacáisica, càmitaté nuwàwa nuchìwáidacuéca pía èeri mìnánái yàasu tàacáisi iyú, nuwènúadacaténáté píiwitáise. Néese, Espíritu Santoquéi iwènúadéericatécué píiwitáise Dios ichàini iyú peebáidacaténáté Jesucristo itàacái. ⁵Càité Dios imàacaca nucàlidacuéca piríni yéewacaténá macáita náalíacawa càmitacué yáalimá èeri mìnánái yáalíacái iwènúadaca píiwitáise Dios irípiná, néese abéericata Dios ichàini idéca imàacacué peebáidaca Jesucristo.

Dios se da a conocer por medio de su Espíritu

⁶Quéwa wacàlidaca tàacáisi yásáidéerica Dios yáalíacái wenàiwicanái irí wàyacaalí wenàiwicanái yáapicha yeebáidéeyéica Jesucristo tàì ímèeri iyú. Quéwa yái yáalíacáisi wacàlidéerica iyú nalíni, càmiírícata èeri mìnánái yáalíacái, níái càmiyéica yeebáida Dios, càmiírícata nacái náalíacái níái icuèyéica yái èeriquéi, imáalèeripínacawa mesúnamáita. ⁷Néese wacàlidaca nalí tàacáisi yásáidéerica nalí Dios

yáaliacái, yái tàacáisi Dios ibèericaté èeri mìnanaí íicha. Bàaluité ipíchawáiseté Dios idàbaca èeriquéi, néenialíté Dios íináidacawa imàacáanápínaté wàyaca yáapicha chènuniré cáimiétacanéri iyú, icànéeyéipínaca mèlumèlúiri iyú nacái, wacùacaténá yáapicha macáita. Quéwa, quéechatécáwa càmítaté Dios icàlida wenàiwicanái iríni. ⁸Níara èeri mìnanaí icuèrinánáica inuényéicaté Wáiwacali cruz ìwali, càmítaté náalíawa Dios íináidacatéwa imànínápínaté walí cayábéeri. Náalíacaalítéwa ìwalítá, yá càmítaté nanúa Wáiwacalítá, yái máiníirica cáimiétacanáca, cachàiníirica nacái íiwitáise, icànéerica mèlumèlúiri iyú chènuniré, icuèrica macáita Dios yáapicha. ⁹Quéwa Dios idéca imàacaca wáaliacawa ìwali yái cayábéerica imàníiripínaca walí. Càite profeta itànàaca Dios itàacái íiméerica:

“Dios idéca ichùnìaca nalípiná cayábéeri wawàsi, níai cáininéeyéica iicáca Dios, yái cayábéeri wawàsi càmíiricáwaca wenàiwica iicá, càmíiricáwaca nacái néemìa iináwaná ìwali, yá nacái càmíiricáwaca náináidawa ìwali”,

íimaca yái Dios itàacáica. ¹⁰Yácata wawàsi Dios imàaquéerica Espíritu Santo yéewáidaca wía ìwali, yácáiná Espíritu Santo yáaliaca Dios íiwitáise ìwali macáita, àta càinácaalí Dios íináidáanáwa iwàwalicuísewa nacái, yái càmíirica áiba yáalía yéemíaca càinácaalí íimáaná.

¹¹Canáca áiba wenàiwica yáaliériwa càinácaalí áiba wenàiwica íináidáanáwa iwàwalicuísewa. Abéericata yái wenàiwica yáaliéricawa càinácaalí íináidáanáwa iwàwalicuísewa. Càita nacái abéericata Espíritu Santo yái yáaliéricawa càinácaalí Dios íináidáanáwa iwàwalicuísewa. ¹²Dios càmítaté ibànùa wawàwaliculé áiba wenàiwica íiwitáise, néese ibànùacaté walí Espíritu Santo yéewacaténá Dios íiwitáise ìyaca wawàwalicu, yéewanápiná wáaliacawa ìwali yái wawàsi cayábanaméerica Dios yèerica walí. ¹³Wéewáidacué pía píalíacaténácué ìwali yái cayábéerica Dios imàníirica walí, yá wacàlidacuéca píiríni càide iyúwa Espíritu Santo yéewáidáaná wía, yái Espíritu Dios néeséerica. Càmítacué wacàlida píiríni èeri mìnanaí yáaliacái iyú yái néewáidéericawa ìwali cháí èeri írìcu. Néese wacàlidacué píiríni píalíacaténácuéwa Dios íiwitáise ìwali càide iyúwa Espíritu Santo iwàwáanácué íimaca píirí, píacué idènièyéica iwàwalicuwa yái Espíritu Santo.

¹⁴Aibanái càmíiyéica idènia Espíritu Santo nawàwalicuwa, càmita neebáida iyúwa Espíritu Santo Dios néeséeri yéewáidáaná wía, caná iwènicáiná naicáca Espíritu Santo yàasu tàacáisi. Càmita nacái náalía néemíaca càinácaalí íimáaná, níacáiná níawamita cawinácaalí idènièyéica

Espíritu Santo iwàwalicuwa, níata yáalía yéemiaca càinácaalí ímáaná yái Espíritu Santo yàasu tàacáisca. ¹⁵Quéwa wía idènièyéica Espíritu Santo iwàwalicuwa wáalíaca cayábéeri ìwali báawéeri fíchaná. Canáca yéewaná èeri mìnanáí nayúunáidaca wáináidacawa máiwitáiséeri iyú wawàwalicuísewa. ¹⁶Càulenáca náichani, yái iyúwa wáináidáanáwa càmicáiná nadènìà Cristo íiwitáise càide iyúwa wadènìaná. Càité nacái profeta itànàaca Dios itàcái ímérica: “Canáca wenàiwica yáaliériwa càinácaalí Wáiwacali íináidáanáwa iwàwalicuísewa. Eeri mìnanáí nacái càmita náalimá nàalàaca Wáiwacali nacàlidacaténá írìni càinácaalí iwàwacutáanápiná imànica”, càì íimaca. Quéwa wía yeebáidéeyéica Cristo itàcái, wíata yáaliáwa ìwali yái Cristo íináidáanácaawa iwàwalicuísewa wadènìacáiná Cristo íiwitáise.

Compañeros de trabajo al servicio de Dios

3 ¹Néeni, píacué nuénánáica, ¿cánacué càmitàacá pibatàa Espíritu Santo yéewáidaca pía? ¿Cánacué píináidawa mamáalàacata iyúwa èeri mìnanáí canéeyéica írì Espíritu Santo? Iná càmitatè nùalimá nuéwáidacuéca pía càulenéri tàacáisi iyú Cristo ìwali, néseté iwàwacutácué nuéwáidaca pía màulenéri tàacáisi iyú càide iyúwa sùmanáicaalícué pía, càmiyéica yáalía yéemiaca càinácaalí ímáaná, yái càulenéri tàacáisca. ²Nuéwáidacatécué pía éeréeri iyú càide iyúwa nàacaalí quìrasìi ìiraca ìinisi càmicáiná yáalimá iyáaca ìinási. Nuéwáidacatécué pía màulenéri tàacáisi iyú, càmicáinácué píalía péemiaca càinácaalí ímáaná yái càulenéri tàacáisca. ¡Siùca nacáide mamáalàacata càmitacué píalíá péemiacani! ³¡Càmitacué píalía péemiaca càinácaalí càulenéri tàacáisi ímáaná pidènìacáinácué èeri mìnanáí íiwitáise mamáalàacata! Nùalíacawa báawacuéca piicáyacacawa píasu cawènìiri ìwalíisewáaca, báawacué nacái piicáyacacawa macáicáiná péenácué iwàwaca áibanái iicácani iyúwa cachàinìiri áibanái fícha canánama ichùuliacaténácué pía macáita. Iná picuísáyacacuécawa píyaca nacái, píseríacuéca píichawáaca nacái. Iná pidènìacuéca mamáalàacata èeri mìnanáí íiwitáise, mamáalàacata nacái pímanícuéca píacawa càide iyúwa èeri mìnanáí imàníná càmiyéica yeebáida Cristo itàcái. ⁴Abénaméeyéi péenácué íimaca: “Núacata Pablo yéewáidacalé píichacué”, càì náimaca; áibanái nacái íimaca: “Núacata Apolos yéewáidacalé píichacué”, càicaalícué píimaca, yá pèepunícuécawa càide iyúwa èeri mìnanáí íináidáanáwa báawéeri iyú.

⁵Càmitacué cayába càì píináidacawa, càmiyéicáiná cachàini wía áibanái fícha, núa Pablo, yá nacái Apolos. Dios yàasu wenàiwicaca

wía, íbaidéeyéica irípiná. Wacàlidacatécué pírí Wáiwacali iináwaná peebáidacaténácué itàacái. Wadéca wamànica yái wáibaidacalécawa Wáiwacali imàaquéericaté walí. ⁶Péemiácué comparación: Abéeri náiwacali idènìaca ibànacale yàalunáwa. Yá ibànùaca yàasu wenàiwicawa ibànacaténá néré. Néese ibànùaca yàasu wenàiwicawa áiba yùucùacaténá néré úni, ipíchaná chuica cáli. Yá Dios imàacaca bànacalé idàwinàacawa cayába. Càita nacái Wáiwacali ibànùacaté núa piatalécué nuíbaidáanápínaté irí pèewibàa nuéwáidáanápínácué pía itàacái iyú quéecháwanáimi; néeseté Wáiwacali ibànùacaté Apolos íbaidacaténá irípiná núamirìcubàa yéewáidacaténácué pía mamáalàacata Cristo ìwali cachàinacaténácué píiwitáise Cristo ìwali. Quéwa abéericata Dios yái imichàidéericuécá píiwitáise. ⁷Iná núa ibànéericaté Dios itàacái piwàwalìcu, Apolos nacái yái icuèricatécué pía núamirìcubàa, càmiyéi cachàini wía áibanái íicha, yácáiná Diosca yái abéericata imichàidéericatécué píiwitáise. ⁸Apolos, núa nacái wáibaidaca Dios irípiná wáapichawáaca, Dios yàasu wenàiwicacáiná wía. Càmita cachàini abéeri wéená áiba wéená íicha, néese Dios idéca imàacaca walí wáibaidacalépiná méetàucunamata wáichawáaca. Quéwa Dios yàapíná nawèni cawinácaalí íbaidéeyéica irípiná. Yàapíná nawèni ìwalíise yái namànínáca náibaidacaléwa Dios imàaquéerica nalí. ⁹Wíata íbaidéeyéi Dios irípiná wáapichawáaca, quéwa píacué, càicuécá píade iyúwa Dios ibànacale, cáininéerica Dios iicáca, iyúwa nacái cayábéeri capii Dios imànírìca iyaca. Iná Dios ibànùaca wía wáibaidacaténá irípiná wayúudáanápínácué pía. ¹⁰Péemiácué comparación: Aiba wenàiwica iwàwacaalí imànica cayábéeri capii íba icapèená, yásí quéechacáwa ibànùaca yàasu wenàiwicawa irìadacaténá néré cachàiníiri íba ibàlùadacatáipínáca íinata capii iwáiná. Néese capii íiwacali ibànùaca yàasu wenàiwicawa áibanái náawináidacaténá cayábanaméeyéi íba capii iwáinápiná. Nabàlùadaca capii iwáiná cachàiníiri íba íinata, yái íba idàbáanéeri wenàiwica irìadéerica. Yái Dios, càicanide iyúwa náiwacali ichùulìerica namànica capii. Quéechatécáwa Dios ibànùacaté núa yàasu wenàiwica nucàlidacaténá wenàiwicanái irí Jesucristo iináwaná ìwali. Siùcade Dios ibànùaca áibanái yéewáidacaténá wenàiwica mamáalàacata. Quéwa cawinácaalí Dios ibànùerica yéewáidacaténá wenàiwica, iwàwacutá iicáca íichawa cayába imànicaténá machacàníiri iyú càide iyúwa Dios iwàwáaná. ¹¹Yái Jesucristoca, càicanide iyúwa idàbáanéeri íba cachàiníiri nalìadéerica cayábéeri iyú nabàlùadacatáipínáca íinata

capii iwáiná. Yái nuéwáidáanáca wenàiwica Jesucristo ìwali, càicanide iyúwa naliadacaalí cayábéeri iyú idàbáanéeri íba cachàiníiri. Canáca yéewaná áibanái yéewáidaca wenàiwica méetàuculé íicha yái tàacáisca, canácáiná áiba Jesucristo íicha weebáidéeripiná itàacái iwàsàcaténá wía Dios yàasu yùuwichàacáisi íicha. ¹²Wéewáidacaalí wenàiwica cáalíacáiri iyú càide iyúwa Dios iwàwáaná, nàyacaténá machacàníiri iyú, níái yeebáidéeyéica Jesucristo itàacái, yásí càica wíade iyúwa wenàiwica ichanàidéeyéica cawèníiri wawàsi capii iwáinápiná, yái oroca, quírameníiri plata nacái, cawèníiri íba nacái, yái cayábanaméeri wawàsi càimíirica yéewa quichái imáalàidaca. Quéwa wéewáidacaalí nía canéeri iwèni tàacáisi iyú, càimíirica iyúudàa nàyaca machacàníiri iyú Dios iicápiná, yásí càica wíade iyúwa wenàiwica ichanàidéeyéica púba capii iwáinápiná, masicái nacái, sitùa ibáiná nacái, yái wawàsi quichái imáalàidéeripináca. ¹³Aiba èeriwa, èeri imáalàacatáipinátawa, Dios yáasáidapiná amaláwacani yái wáibaidéerica irípiná, quichái yéenáiwaná yàanàapinácaalí. Néesecué quichái yáalimáidapiná iicáwa wáibadacalé wamàníirica Dios irípiná cawiná íiwitáanácaalíni. Càipiná Dios yáasáidaca asáisi cayábacaalíni, càmicaalí nacái caná iwèni, yái wéewáidáanáca wenàiwica. ¹⁴Wéewáidacaalí wenàiwica cayába nàyacaténá machacàníiri iyú càide iyúwa Dios iwàwáaná, yásí yái wáibaidéerica Dios irípiná ìidenìapiná quichái, càide iyúwa cawèníiri íba icapèená càimíirica yeemáwa, yásí Dios yàapináca wawèniwa, wía yàasu wenàiwicawa. ¹⁵Quéwa càmicaalí wéewáida wenàiwica cayába nàyacaténá machacàníiri iyú Dios iicápiná, yásí quichái imáalàidapiná yái wáibaidéerica, càide iyúwa quichái yeemácaalí capii idènièrica iwáináwa masicái meedá, yásí yái wáibaidéerica imáalàapináca wáicha, càmita nacái Dios yàapiná wawèni. Quéwa éwita yái wáibaidéerica imáalàacaalíwa wáicha, càicáaníta cáupiná wíawa quichái íicha iyúwa wenàiwica ipiacaalíwa quichái ipèrùu yèewíise, yá càmita wamáalàapináwa.

¹⁶Abénaméeyéi wenàiwica namànica manuíri capii íipidenéeri templo, yá nawàlùacawa nàacaténá Dios icàaluíniná. ¿Càmitasicué píalíawa Dios yàasu templocá pía Espíritu Santo iyacáinácué piwàwalicu?

¹⁷Abéerita Dios irípinácué pía, càide iyúwa Dios icapèe. Píacatacué yái Dios yàasu templocá. Iná áibacaalí báawa imànicuéca píiuitáise cachìwéeri tàacáisi iyú, yásí Dios yùuwichàidapiná manuísíwatani.

¹⁸Picácué píináidawa máiníná cáalíacáica pía. Aibacaalí péenácué íináidawa máiníná cáalíacáicani èeri mìnánái yáalíacái iyú, iwàwacutá

iwènúdaca íiwitáisewa íicha yái íínáidáanácawa íicácáténá yáawawa iyúwa càmfíríca cáalíacái áibanái íicha. Càita yáalímá cáalíacáicani báisíiri yáalíacáisi iyú, yái yáalíacáisi yàanèrica Dios néese. ¹⁹Caná iwèni Dios íicáca èeri mìnanaí yáalíacái càide iyúwaté profeta itànàaná Dios itàacái íiméerica: “Dios yùuwichàidapíná nía cawinácaalí cáimacáiyéica íicá yáawawa, níai icàlidéeyéica náalíánásawa manùba wawàsi ìwali cháí èeri mìnanaí íiwitáise iyú. Yái báawéerica nawàwéerica namànica áibanái írí, Dios imàacapíná yàanàaca nàwali idècunitàacá nachìwáidaca áibanái náalíacái iyúwa”, íimaca. ²⁰Càité nacái áiba profeta itànàaca Dios itàacái íiméerica: “Wacuèriná Dios yáalíacawa canáca iwèni meedá yái náináidáanácawa cawinácaalí íínáidéeyéica cáalíacáica èeri mìnanaí yáalíacái iyú”, íimaca. ²¹Iná picácué cachàini piicáca píawawa ìwalíise yái áiba wenàiwica yéewáidáanáca pía, náiméerica ìwali cayábéericasani áibanái íicha yéewáidéeyéi wenàiwica. Iwàwacutácué cayábaca piicáca nía canánama abédanamata Dios imàacacáinácué pírí macáita. ²²Dios imàacacué pírí núa Pabloca, yá nacái Apolosca, yá nacái Pedro wéewáidacáténácué pía. Dios imàacacué pírí yái èeriquéi pìyacáténácué cháí èeri írìcu. Imàacacué pírípiná nacái yéetácáisi. Imàacacué pírí nacái siùca èeride, macái èerita wapíchalépinácáwa nacái. Càicué Dios imàacaca pírí macáita. ²³Yá Cristo yàasu wenàiwicacuéca nacái pía, Cristocáiná nacái Dios yàasu wenàiwicaca.

El trabajo de los apóstoles

4 ¹Càita iwàwacutácué píináidacawa wàwali, wía apóstolca, íibaidéeyéica Cristo írìpiná, Cristo ibànùnacáiná wía wéewáidacáténácué pía iyú yái cayábéeri tàacáisica Dios ibèericaté áibanái íicha. Siùcáisede Dios imàacaca wáalíacawa cayábéeri tàacáisi ìwali. ²Wenàiwica íibaidacaalí áiba írí, iwàwacutá imànica càide iyúwa íiwacali íímáaná írí. ³Iná càmita nuínáidawa ìwali yái píímáanácuéca nùwali, píimacaalícué nùwali càmitasa nuíbaida cayába. Càita nacái càmita nuínáidawa ìwali yái áibanái íímáanáca nùwali. Núa nacái canáca yéewaná núumaca nuíbaidacasa cayába Dios írìpiná càmicáiná núalímá núalíaca nuíwítáisewa càide iyúwa Dios yáalíánáwa. ⁴Càmita nuwàwali asáísí numànicaalíté áiba wawàsi báawéeri, quéwa cawàwanáta nudéca numànica áiba wawàsi càmfíríca núalíawa ìwali. Abéericata Wáiwacali yái yáaliéericawa, yácata yái icàlidéeripínaca nuináwaná ìwali asáísí nuíbaidacaalíté írìpiná cayába,

càita nacái canéerica iwènicaalí meedáni, yái numàníricaté. ⁵Iná picácué picàlida áibanái iináwaná ìwali càmitasa náibaida cayába Dios irípiná. Picùacué Wáiwacali yàanàanápíná, yásí yáasáidapíná amaléeri iyú yái wamàníirica ibàacanéeri iyú. Yáasáidapíná nacái càinácaalíté wáináidáanáwa wawàwalicuísewa wèpunícaalíté wáibaidaca Dios irípiná. Néese cayábacaalí Dios iicá yái wamàníirica, yásí Dios icàlidapíná wamànicaté cayábéeri.

⁶Píacué nuénánáica, nùlàacuéca pía càiri tàacáisi iyú nuyúudàacaténácué pía, yéewanápinácué nacái pìyaca càide iyúwa Apolos iyáaná, núa nacái, ipíchanácué picutáca áiba tàacáisi Dios itàacái fícha, yéewanápinácué nacái cayábaca piicáca abédanamata macáita wenàiwica íbaidéeyéica Dios irípiná, nía nacái yéewáidéeyéicuéca pía. Báawéeriquéi cachàinínácuéca piicáca píawawa ìwalíise yái pidènianácuéca áiba yéewáidéericuéca pía píiméericuéca ìwali cayábéericasani áibanái fícha canánama. ⁷Néeni, ¿cánácué yéewa cáimacái piicáca píawawa áibanái fícha canánama? ¿Càmitasicué píalíawa Dioscata yái yèerica pírí macáita pidènièricuéca? Dios yàacáinácué píriní, néese ¿cánácué yéewa cachàinica piicáca píawawa càide iyúwa pídeca nacáicaalícué peedáca píriwani pichàini iyúwa?

⁸Piyúunáidacuéca píalíacawa macáita wawàsi Dios ìwali. Piyúunáidacuéca pìyaca càide iyúwa càasuíyèi idènièyèica manùba cawèníiri, càimíyèica iwàwacutá áibanái iyúudàaca. Piyúunáidacuéca píalíacawa macáita yái iwàwacutéericuéca píalíacawa, íná càmitacué píwàwa wéewáidaca pía quirínama. Piicácuéca píawawa iyúwa èeri mìnánái icuèrinánái càimíyèica iwàwacutá wayúudàaca. Dios imàacacaalícué picùaca macái wenàiwica cachàiníiri iyútá, yá nucùacuéca nía píapichatá. Quéwa càmita nacuèriná núa cháí èeri írìcu, canásíwata. ⁹Wía apóstolca, càmita yéewa wàya iyúwa èeri mìnánái icuèrinánái, nuínáidacáináwa cawàwanáta Dios idéca imàacaca wàuwichàacawa manuísíwata, wía apóstolca. Báawaca èeri mìnánái iicáca wía iyúwa presoíyèi imàníyèica ibáyawanáwa manuísíwata, yéetéeyéipínacawa máini báawéeri iyú nabáyawaná ìwalíisewa. Eeri mìnánái, ángelnái nacái náináidacawa manuísíwata naicáidaca walí idècunitàacá wàuwichàacawa. ¹⁰Madécaná wenàiwica naicáca wía iyúwa máiwitáiséeyèi wàuwichàacáináwa Cristo irípiná. Quéwa piicácuéca píawawa iyúwa cáiwitáiséeyèi Cristo itàacái ìwalíise. Píimacuéca càmitasa pímaní iyúwa máiwitáiséeyèi ipíchanácué píuwichàacawa iyúwa wía. Eeri mìnánái iicáca wía iyúwa machawàaquéeyèi càmicáiná

wéewáida wenàiwica èeri mìnaná yáaliacái iyú. Néese piicácuéca píawawa iyúwa cachàiniyéica íiwitáise, cámiétacanéeyéica nacái, quéwa èeri mìnaná iicáca wía iyúwa canéeyéi iwèni, wía apóstolca. ¹¹Mamáalàacata àta siùca nacáide wàuwichàaca máapicái, macàlaca nacái wawàwa, canáca nacái wabàle cayába. Aibaalí nacapèedáidaca wía. Canáca nacái wacapèesiwa. ¹²Wáibaida nacái wacáapi iyúwa cachàiníri iyú àta chamàlecataléta wía wawèniacaténá wayáawa. Aibanái icuísaca íichawa wía, quéwa wasutáca nalí Dios imàníinápíná nalí cayábéeri. Nàuwideca namànica wía quéwa wàideniaca yái báawéerica namànírira walí. ¹³Natàanica báawéeri iyú wàwali, quéwa càicáaníta watàanica nalí éeréeri iyú quéwanáta. Mamáalàacata àta siùca nacáide namànica walí càide iyúwa náucacaalí náichawa báawéeri yáaséerimi, casaquèeri wawàsi natunuérica bàacháwalicuise.

¹⁴Càmita núumacué pirí càì nubáiniadáanápínacué pía, néese nuwàwacáita nùalàacuéca pía càide iyúwa nuénibewa, cáininácáinacué nuicáca pía. ¹⁵Yácáiná éwitasica diez mil namanùbaca yàanàacaalí néewáidacaténacué pía Cristo ìwali, càicáaníta càmítacué pidènià madécaná pisèenáwa. Núacata càide iyúwacué píaniri, bàaluitécáiná nucàlidacué pirí Cristo Jesús iináwaná, yáté peebáidacuéca itàacái, iwàsàanápínacué pía Dios yàasu yùuwichàacáisi íicha. ¹⁶Iná nusutácué píicha wawàsi manuísíwata pimànicaténacué càide iyúwa numàniiná, càide iyúwacué píaniricaalícué núa.

¹⁷Nudéca nubànùacuéca píatalé Timoteo, yái nuiquéerica iyúwa nuìriwa cáininéerica nuicáca Wáiwacali ìwalíise. Núalfacawa Timoteo ìwali imàníinápíná cayábéeri mamáalàacata càide iyúwa nusutáaná íicha. Nubànùacaté Timoteo iwàwalicaténacué pía càinácaalí nùyaca mamáalàacata càide iyúwa iwàwacutáaná wenàiwica iyaca yeebáidéerica Cristo Jesús itàacái. Càita nuéwáidaca wenàiwica nàyacaténá càì macái níái yeebáidéeyéica Cristo Jesús itàacái macái cáli íinata, àta alénácaalí nuèpuníwa. ¹⁸Abénaméeyéi péenacué cachàinica naicáca níawawa nayúunáidacáiná cáaluca nùaca nupáchiaacuéca pía. ¹⁹Quéwa nuwàwacué nùacawa nuicáca pía mesúnamáita Wáiwacali imàacacaalí numànica càì. Yásí nùacawa nuicáténá yái náiméerica náalimáanása namànica náibaidacaténása Dios irípiná, náimaca, níara cachàiniyéica iicáca yáawawa. Càmita nùawa néré nuémìacaténácáita nasàna meedá, náimaca cachàiníinása nía. ²⁰Càmita nuwàwa nuémìaca nacàlidacáicata naináwanáwa, yácáiná cawinácaalí wenàiwica Dios icuèyéica náasáidaca Dios yàasu wenàiwicaca nía idènièyéica

Dios ichàini náibaidacaténá Dios irípiná cachàiníri iyú, nàyacaténá nacái machacàníri iyú. Càmita nacàlidacáita meedá naináwaná ìwaliwa nadènianása Dios ichàini. ²¹Néeni, ¿càinásicué piwàwa numànica? ¿Piwàwasicué nùanàaca pìatalé nùuwichàidacaténácué pía pibáyawaná ìwalísewa, yái cachàinífinácuéca piicáca píawawa? Càmicaalícué piwàwa nùacawa pìatalé nùuwichàidacaténácué pía, néese piwènúadacué píiwitáisewa píináidacaténáwa machacàníri iyú, piicáténácué píawawa iyúwa càmiyéica cachàini, yéewacaténácué nùalàaca pía ééréeri iyú cáininácáinácué nuicáca pía.

Juicio sobre un caso de inmoralidad

5 ¹Macáita nacàlidacué nalíwáaca piináwaná ìwali báawéeri iyú iyacáiná abéeri péenácué yeedéericaté iríwa yáatúanáwa, úara yáaniri yàacawéetúaca. ¡Máini báawéerica yái namànírica pèewi! Ewita èeri mìnanaí càmicáaníta neebáida Jesucristo itàacái, càicáaníta càmita máini namàni càiri báawasíwéeri wawàsi, càide iyúwacué péená imàníná. ²¿Cánácué cachàini piicáca píawawa mamáalàacata? ¡Ìwàwacutácué máini achúmaca piwàwa manuísíwata pibáyawaná ìwaliwa! Yái asiali imànírica càiri báawéeri, iwàwacutácué piúcaca pèewíisewani yái asialica. ³Ewita càmicáaníta nùyaca píapichacué néré, càicáaníta nuicáca núawawa iyúwacué abéeri péená. Nudéca nuínáidacawa nùuwichàidáanápíná yái asialica càide iyúwa nùyaca nacáicaalícué píapicha néré. Yái Wáiwacali Jesucristo idéca ichùulíaca núa nucàlidáanápíná càinácalí iwàwacutáanápíná yùuwichàacawa yái imànírica càiri báawasíwéerica. ⁴Piwacáidáyacacuéwa, yá píináidacuéwa nùwali càide iyúwa nùyaca nacáicaalícué píapicha, nùalàacaténácué pía. Yásí Wáiwacali Jesús cachàiníri íiwitáise ìyapínácué píapichawa. ⁵Iná iwàwacutácué pèepùadaca yái asialica Satanás irí yéewanápiná Satanás imáalàidaca iiná uláicái iyú àta yéetácatalépinátawa ipíchaná yùuwichàacawa Dios yàasu yùuwichàacáisi iyú càiripinátawa Wáiwacali Jesús yàanàacaalípiná àniwa.

⁶Picácué picàlida piináwanáwa canùmaséeri iyú cayábáanásacué pía idècunitàacá pimàacacué abéeri péená imànica càiri báawéeri. Píalíacuéwa comparación íiméerica: “Nèewíadacaalí achúmanamata levadura íbesi yèewi, yá levadura imàacaca macáita íbesi inísàapínacawa”, càì íimaca yái comparaciónca wabáyawaná ìwali. Yái levadura íimáanáca càicanide iyúwa wenàiwica ibáyawaná. Iná pimàacacaalícué abéeri péená imànica ibáyawanáwa mamáalàacata, yásí mesúnamáita

macáitacué pía pimànipiná piacawa pibáyawanáwa. ⁷Iná piúcacué pèewísewa yáara levadura nacáirica íwítáise, yái péenácuéca imànírica báawéeri, ipíchanácué báawaca imànica píwítáise canánama. Yásí píalimácué piyaca wàlisài iyú, mabáyawanéeri iyú nacái. Càicuéca píade iyúwa wàlisài pan, càmfíri idènia levadura, Dioscáiná idéca yúucacué pícha yái báawéerica pimàníricaté. Càide iyúwa judiónái nanúacaalí oveja wàlisài nàasu culto Pascua yaalíwa nawàwalicaténá iyúwaté Dios iwasàaná nía, càita nacái wàasu Cordero ípidenéerica Cristo yéetácatéwa iwasàacaténá wía, wàyacaténá wàlisài iyú. ⁸Judiónái namànica nàasu Pascuawa, yá náucaca náichawa macáita levadura. Càita nacái, wáucacué wáichawa yái levadura nacáirica wáiwítáiseca bàaluisàimica. Picácué wàya quirínama wabáyawaná yáapichawa. Càide iyúwa pan càmicaalí idènia levadura, càita nacái iwàwacutá wàyaca masaquèeri wáiwítáise yáapichawa, watàanícué nacái báisíiri iyú.

⁹Bàaluité nutànàacatécué pirí áiba cuyàluta nùalàacaténácué pía ipíchanácué piacawéeridaca wenàiwica iiméeyéica áiba yáapicha càmfíchúaca náinusíwa, càmfírica nacái nanìrisíwa. ¹⁰Quéwa càmitacué píalía péemiaca cayábani càinácaalíté ímáaná yái núméericatécué pirí. Càmita nuchùuliacué piánápináwa déeculé náicha macái èeri mìnánái càmfíyéica yeebáida Jesucristo itàacái, níái iiméeyéica áiba yáapicha càmfíchúaca náinusíwa, càmfírica nacái nanìrisíwa, nía nacái iwàwéeyéica yeedáca iríwa macái wawàsi cawènfíri, nía nacái cayéedéeyéica, nía nacái yèeyéica ídolo icàaluíniná, yái cuwáinái yéenáiwanáca. Càmitàacá píalimácué piacawa náicha àta péetácatalétacuéwa piacaténáwa èeri íicha. ¹¹Càmitaté càì nuchùuliacuéca pía, néese nùalàacatécué pía ipíchaná piacawéeridaca wenàiwica icàlidéeyéica iináwaná ìwaliwa neebáidáanása Jesucristo itàacái quéwa namàni nàacawa càiri báawéeri: Naimáca áiba yáapicha, càmfíchúaca náinusíwa, càmfírica nacái nanìrisíwa; nawàwaca needáca nalíwa macái wawàsi cawènfíri; nàaca ídolo icàaluíniná yái cuwáinái yéenáiwanáca; natàaníca báawéeri iyú áibanái ìwali, áibaalí nacái nacàmaca; áibaalí nacái nayéedùaca, quéwa mamáalàacata nacàlidaca naináwanáwa neebáidáanása Jesucristo itàacái. Picácué piacawéerida nía; picácué piyáa piyáacaléwa náapicha. ¹²⁻¹³Dios càmitacué ichùulia wàuwichàidaca èeri mìnánái càmfíyéica yeebáida Jesucristo itàacái. Néese Diosta yùuwichàidapiná níawa. Quéwa cawinácaalí iyéeyéica pèewibàa, nacàlidacaalí naináwanáwa neebáidáanása Jesucristo itàacái,

quéwa namànica nabáyawanáwa, néese iwàwacutácué picháawàaca naináwaná ìwali, pialàacaténácué nía cachàiníri iyú. Iná piúcacué pèewísewa yái imàníríca ibáyawanáwa.

Pleitos ante jueces no creyentes

6 ¹Aiba yeebáidéeri Jesucristo itàacái imànicaalícué pírí báawéeri, ¿cánácué picháawàa iináwaná ìwali jueznái irí càmíiyéica yeebáida Jesucristo itàacái? Báawéeriquéi pimàniínácuéca còi. Néese iwàwacutácué picháawàaca iináwaná ìwali Dios yàasu wenàiwica irí, yeebáidéeyéica Jesucristo itàacái ìwacáidáyaquéeyéicawa, nachùnìacaténácué pírí yái wawàsica. ²Píacué Dios yàasu wenàiwicaca, píalíacuéwa Dios imàacáanápínácué péemiaca èri mìnaná iináwaná ìwali èri imáalàacaalípináwa picàlidacaténácué iwàwacutáaná nàuwichàacawa càiripinátawa nabáyawaná ìwalísewa. Iná yéewa píalimácué péemiaca piináwanáwáaca achúméeriina wawàsi ìwali cháí èri irícu pichùnìacaténácué wawàsi píríwáaca, píacué yeebáidéeyéica Jesucristo itàacái. ³Píalíacuéwa nacái wémianápiná nacái ángelnái iináwaná ìwali wacàlidacaténá cayábacaalíni, báawacaalí nacái, èri imáalàacaalípináwa. Iná màulenáca meedá péemiacuéca piináwanáwáaca cháí èri irícu, pichùnìacaténácué píríwáacani, yái achúméeri wawàsica. ⁴Iná abéeri péenácué yeebáidéerica Jesucristo itàacái cháí èri irícu imànicaalícué pírí báawéeri, ¿cánácué picháawàa iináwaná ìwali jueznái irí picàlidéeyéica iináwaná canápinéeyéicasa nía, níara càmíiyéica yeebáida Jesucristo itàacái? ⁵Núumacué pírí còi báicaténácué pía, piwènúadacaténácué píiwitáisewa. ¿Càmitasicué ìya abéeri péená yáaliméeri yéemiacuéca piináwaná, ichùnìacaténácué píichawáaca yái wawàsica? ⁶¡Báawéeriquéi pipélianácuéca, picháawàayaca nacáwa jueznái irí, quéwa báawéeriquéi cachàiníwanái picháawàanácuéca piináwaná ìwaliwáaca jueznái irí càmíiyéica yeebáida Jesucristo itàacái!

⁷Picháawàacaalícué piináwaná ìwaliwáaca, yá pidécuéca pimàacaca báawéeri icàbadàacuéca pía, càmítacué nacái pimàni càide iyúwa Dios iwàwáaná. Aiba yeebáidéeri Jesucristo itàacái, imànicaalícué pírí báawéeri, iyéedùacaalícué píicha pìasu nacái, yá cayába cachàiníwanái pìidenìacaalícué pìuwichàanáwa masànatatá, ipichaná èri mìnaná càmíiyéica yeebáida Jesucristo itàacái naicácuéca pipéliayacacawa. ⁸¡Quéwacué càmita pìideniani, néese pimànicuéca còi pibáyawanáwa cachàiníwanái: Pimànicuéca áibanái irí báawéeri, piyéedùacuéca nàasu, éwita pimanùbacacáanáita nía!

9-10 Píalfacuéwa báawéeyéi íiwitáise càmita nawàlùapináwa Dios ìyacàle iriculé, yáí icùacataléca chènuníserica. Picácué pibatàa áibanái ichìwáidaca pía cachiwéeri tàacáisi iyú. Càmiíyéipiná iwàlùawa Dios ìyacàle iriculé cawinácaalí imàníyéica yáalaniwa; nía nacái yèeyéica ídolo cuwáinái yéenáiwana ícàaluíniná; nía nacái iiméeyéica inanái yáapicha càmiíchúaca náinusíwa, nía nacái iiméeyéica asìali yáapicha càmfírìca nanìrisíwa; nía nacái asianái imàaquéeyéica áiba asìali iduica, áibanái nacái asianái iiméeyéica inacáiri yáapichawa; nía nacái iyéeduèyéica; nía nacái iwàwéeyéica yeedáca iríwa macái wawàsi cawèníiri, nía nacái icàméeyéica; nía nacái itàaníyéica báawéeri iyú áibanái ìwali, nía nacái ipéliéyéica áibanái nayéedùacaténá nàasu. Nía càmiíyéipináta iwàlùawa Dios ìyacàle iriculé chènuniré. ¹¹ Càitécué abénaméeyéi péená ìyacaté ipíchawáiseté piwènúadacuéca píiwitáisewa Dios irípiná peebáidacaténácué Jesucristo itàacái. Quéwa Dios idéca imàacacué iwàwawa pibáyawaná íicha càide iyúwa idéca nacáicaalícué íibaca píichani. Idéca nacái yeedácuéca pía yàasu wenàiwicapináwa mabáyawanácaténá iicácuéca pía. Càita Dios idéca imànicuéca pirí cayábéeri Wáiwacali Jesucristo íipidená ìwali, yéetácáinatéwa wáichawalíná. Dios idéca imàacacué yàasu wenàiwicaca pía Espíritu Santo ichàini iyú, yáí Espíritu Dios ibànuéricuéca piwàwaliculé.

La santidad del cuerpo

¹² Abénaméeyéi nacàlidaca: “Càmicaalí Dios imáisanìa numànica áiba wawàsi, yásí cayábaca numànica macái wawàsi nuwàwéerica numànica”, càì nàimaca. Quéwa, núumacué pirí, éwita Dios càmicáaníta imáisanìa wamànica áiba wawàsi, càicáaníta càmita macái wawàsi iyúudàa wía, áibanái nacái. Báisíta Dios imàacaca wamànica càide iyúwa wawàwáaná càmicaalí báawa yáí wawàwéerica wamànica, quéwa iwàwacutá wacùaca wíawawa ipíchaná yáí wawàsi wawàwéerica wamànica idacùaca wía cachàiníiri iyú àta càmicataléta wáalimá wamàacaca wáichawani. Báawaca wamàacacaalí áiba wawàsi idacùaca wáiwitáise. ¹³ Nacàlidaca báisíiri iyúni nàimacaalí yàacàsi ìwali watùra irípinéerica, watùra nacái wayáacalé irípiná. Báisíta, Dios imàacaca wayáaca macái yàacàsi wawàwéerica. Quéwa áibaalípiná Dios imáalàidapiná yàacàsi, watùra nacái càmicáiná iwàwacutá wayáaca wayáacaléwa quirínama. Quéwa wainá càmita ìya càide iyúwa yàacàsi; namànicáita nachìwawa meedá nàimacaalí cayábacasa waimáca áibanái yáapicha cawinácaalí wawàwéeri, càmicáaníta

wáinusíwani, càita nacái càmicáaníta wanìrisíwani. Càmita báisi nataacái, néese, yái waináca, yácata Wáiwacali yàasu weebáidacatená itàacái. Wáiwacali nacái wainá irípinéri, ichàiniadacatená wainá, yéewanápiná wáibaidaca irípiná. ¹⁴Càide iyúwaté Dios imichàidáaná Wáiwacali yéetácáisi fícha, càita nacái imichàidapíná wíawa yéetácáisi fícha íiwitáise cachàiníiri iyúwa, yái chàinisi imichàidéericaté iyú Wáiwacali.

¹⁵¿Càmitasicué pialíawa piiná ìwaliwa Cristo iiná ìwalíiséericani? Yácáiná wía yeebáidéeyéica Cristo itàacái, càica wíade iyúwa Cristo iiná iyéerica cháí èeri írìcu. Ìiná máini báawaca abéericaalí wéená imànica íbáyawanáwa inaná yáapicha iiméechúaca asianái yáapicha plata ìwalinápiná! ¡Picácué wamàni càiri báawéeri! ¹⁶¿Càmitasicué pialíawa asiali iimácaalí inaná yáapicha iiméechúaca asianái yáapicha plata ìwalinápiná, yásí níái pucháibaca abéericata nainá? Càité profeta itànàaca Dios itàacái nàwali cawinácaalí iiméeyéica yáapichawáaca: “Dios iicáca níái pucháibaca iyúwa abéeri wenàiwica”, càì íimaca. ¹⁷Quéwa wenàiwica yeebáidacaalí Wáiwacali itàacái, yásí iyaca abédanamata Wáiwacali yáapicha.

¹⁸Iná piacuéwa náicha caqualéta cawinácaalí iimáidéeyéicuéca pía piimáanápiná áiba yáapicha cà míirica pinìrisíwa, cà míichúaca nacái píinusíwa. Macái áiba nabáyawaná íiwitáaná càmita imàni báawéeri nainá írìwa, quéwa cawinácaalí iiméeyéica áiba yáapicha cà míirica nanìrisíwa, cà míichúaca nacái náinusíwa, namànica nabáyawanáwa nainá írìwa. ¹⁹¿Càmitasicué pialíawa piiná ìwalicuéwa Espíritu Santo yàasu templocani, yái Espíritu Santo Dios imàaquéericatécué pirí, yá nacái Espíritu Santo iyacuéca piwàwalìcu? Càmitacué píiwacali píawawa. ²⁰Yái Diosca, yácatacué Píiwacali, Dioscáiná iwènìacatécué pía cawèníiri wawàsi iyú, yái Iiri íiranáca. Iná picácué pimàni pibáyawanáwa piiná iyúwa, néese pìyacué mabáyawanéeri iyú yéewanápiná áibanái náalíacawa máini cayábéerica íiwitáise yái Diosca.

Consejos sobre el matrimonio

7 ¹Siúcade nucàlidacué piríni yái pisutéericuéca péemíawa núa ìwali pibànùacaalítécué nulí cuyàluta. Báisíta cayábaca cà micaalí asianái idunùa inaná ìwali. ²Quéwa madécaná wenàiwica nawàwaca naimáca áiba yáapicha, cà míichúaca náinusíwa, cà míirica nacái nanìrisíwa, íná cayábacata macái asianái yeedáca íinuwa, macái inaná nacái uedáca unìriwa. ³Iwàwacutá asiali iimáca íinusíwa yáapichawa càide

iyúwa iwàwacutáaná imànica. Càita nacái iwàwacutá inanái uimáca unìrisíwa yáapichawa. ⁴Uái inanáica càmita uiná íiwacalu úa, néese unìri yàasucani. Càita nacái asiali, càmita iiná íiwacalini, néese ínu yàasucani. ⁵Picácué pimáisanà piináwa pínu íichawa, pinìri íicha nacáiwa, càmicaalícué abédanama píiwitáise píapichawáaca quéechacáwa càmfínápiná piimá píapichawáaca maléená èerita pisutáanápinácué Dios íicha manuísíwata. Pidécánáamicué pimáalàidaca pimànica càì, néese iwàwacutácué pèepúa piimá píapichawáaca àniwa ipíchanácué càmita píalimá picùaca píawawa, yá Satanás yáalimáidacuéca pía pimànínápiná pibáyawanáwa áiba yáapicha.

⁶Càmitacué nuchùulia pía peedáanápiná píríwa píacawéeripináwa, quéwa piwàwacaalícué picásàacawa, yá cayábacani. ⁷Macái wenàiwica náalimácaalí nàyaca abéeritatá càide iyúwa nùyáaná canéeri ínutá, yá cayábacatáni, quéwa càmita macái náalimá nàyaca abéerita. Néese Dios imàacaca walí wáalimáwanama madécaná chàinisi íiwitáaná wáibaidacaténá irípiná, wadèñanápiná wáalimáwanama wáibaidacaléwa méetàucunamata wáichawáaca. Dios imàaca abénaméeyéi wéená nàyaca abéerita casíimáiri iyú. Imàaca áibanái wéená nàyaca nàacawéeri yáapichawa casíimáiri iyú.

⁸Núumacué píri píacué máinuíyéica, manìríyeyéi nacái, píacué nacái inìrimi yéetéeyéimicawa íicha, cayábaca piyamáacaalícuéwa abéerita càide iyúwa nùyáaná abéerita. ⁹Quéwa càmicaalícué píalimá picùaca píawawa ipíchaná pimànica pibáyawanáwa, yásí iwàwacutácué peedáca piníriwa, pínu nacáiwa, cayábacáiná cachàíníwanái picásàacaalícuéwa máinicáichacué píináidáanicawa piimáanápiná áiba yáapicha.

¹⁰⁻¹¹Quéwa nuchùuliacué pía, píacué cáinuíyéica, píacué nacái canìríyeyéica càide iyúwaté Wáiwacali íimáaná walí, càmfínápiná inanái imàaca inìriwa, càita nacái càmfínápiná asiali imàaca ínuwa. Càmfíricata núa meedá yái ichùulièricuéca pía, néese Wáiwacalicata yái ichùulièricuéca càmfínápiná pimàni càì. Quéwa inanái uèpùacaalíwa unìri íichawa, iwàwacutá uyamáacawa abéechúata, canáca yéewaná uedá ulíwa áiba àniwa. Néese càmicaalí quirínama uwàwa ùyaca abéechúata, yá iwàwacutá unìri, úa nacái nawènúadaca náiwitáisewa nalíwáaca nàyacaténá abédanamata náapichawáaca àniwa.

¹²Siùcade nuwàwacué nùalàaca pía quiríta càide iyúwa nuínáidáanáwa, píacué áibanái yeebáidéeyéica Wáiwacali itàacái. Càmita Wáiwacali ichùulia núa nùalàanápinácué pía tàacáisi iyú núuméeripinácuéca píri, quéwa nuínáidacawa cayábacani. Péemíacué: Abéeri asiali

yeebáidéeri Jesucristo itàacái ínucaalí càmfíchúa yeebáida, quéwa uwàwacaalí ùyaca yáapicha, iwàwacutá asiali yeebáidéerica Jesucristo càmita imàaca íichawa úa. ¹³Càita nacái inanái yeebáidéechúa Jesucristo itàacái unìricaalí càmfiri yeebáida, quéwa iwàwacaalí ìyaca úapicha, iwàwacutá inanái yeebáidéechúa Jesucristo càmita umàaca úichawani. ¹⁴Cayábaca nayamáacawa náapichawáaca, yácáiná Dios iicáca iyúwa yàasu wenàiwicapináwa yái asialica ùwalfise úái ínuca yeebáidéechúaca Jesucristo. Càita nacái Dios iicáca iyúwa yàasu wenàiwicapináwa úái inanáica ìwalfise yái unìrica yeebáidéerica Jesucristo. Píacué yeebáidéeyéica Jesucristo, càmicaalícué piyamáawa piacawéeri yáapichawa càmfirica yeebáida, yá cawàwanátacué péenibe càmita neebáida Jesucristo itàacái; néese piyamáacaalícuéwa piacawéeri yáapichawa, péenibe yáapichawa nacái, yásí Dios iicácuéca péenibe iyúwa yàasu wenàiwicapináwa. ¹⁵Quéwa yái unìrica, úa nacái ínuca, càmfíyéica yeebáida Jesucristo itàacái máinícaalí nawàwaca nèepùacawa nàacawéeri íichawa yeebáidéerica, pimàacacué nèepùacawa náicha. Píacué yeebáidéeyéica Jesucristo itàacái, càmitacué iwàwacutá piyamáacawa piacawéeri yáapichawa càmfirica yeebáida nawàwacaalí nèepùacawa píichacué càmicáiná Dios iwàwa wapéliyacacawa, néese Dios idéca imáidaca wía wàyáanápíná matuíbanáiri iyú. ¹⁶Nawàwacaalícué nèepùacawa píicha, pimàacacué nèepùacawa ipíchanacué pipéliyacacawa, càmicáinácué pialíawa, píacué inanáica, asásí pialimácaalí piwènúadaca pinìri íiwitáisewa Dios írípíná. Càita nacái píacué asianáica, càmitacué pialíawa asásí pialimácaalí nacái piwènúadaca píinu íiwitáisewa Dios írípíná.

¹⁷Píalimáwanama macáitacué iwàwacutáca pìyaca càide iyúwaté Wáiwacali imàacáanátécué pirí chàinisi píibaidacatenácué írí. Càmicaalícué báawa yái píibaidacaléca, néese pìyacué càide iyúwaté pìyáaná Dios imáidacaalítécué pía. Càita nùalàaca macáita wenàiwica yeebáidéeyéica Jesucristo itàacái, ìwacáidáyaquéeyéicawa yàcalé imanùbaca. ¹⁸Dios imáidacaalí asiali namàníricaté írí circuncisión, càmita iwàwacutá iwènúadaca yàasu circuncisiónwa. Càita nacái Dios imáidacaalí asiali càmfiricaté namàni írí circuncisión, càmita iwàwacutá imàacaca namànica íríní siùcade. ¹⁹Píacué achúma píináidánícawa piwàwawa circuncisión ìwali, cáininácáiná Dios iicáca macái wenàiwica íiwitáaná abédanamata. Abéerita píináidacuéwa pimànínápiná machacàníiri iyú càide iyúwa Dios iwàwáaná. ²⁰Càmicaalícué báawa píibaidacalé, néese iwàwacutácué macáita

pìyaca càide iyúwa pìyáanáté quéecha Dios imáidacaalítécué pía. ²¹Aibanái yàasu wenàiwicacaalíté pía íbaidéericaté mawèníri iyú Dios imáidacaalíté pía, picá achúma piwàwa ìwali. Quéwa namàacacaalí pèepunicawa matuíbanáita, yá cayábaca pèepunicawa máiwacalináwaca. ²²Cáinináca Dios iicáca macái wenàiwica íiwitáaná abédanamata, íná áibanái yàasu wenàiwicacaalíté pía íbaidéerica mawèníri iyú Dios imáidacaalíté pía peebáidáanápínaté Wáiwacali itàacái, néese siùcade éwita áibanái yàasu wenàiwicacáaníta pía mamáalàacata, càicáaníta iwàwacutá piwàwalica Wáiwacali idéca iwasàaca pía Dios yàasu yùuwichàacáisi fícha píibaidacaténá Wáiwacali irípiná; càita nacái pía yèepuniiricatéwa máiwacalináwaca cháì èeri irícu Dios imáidacaalíté pía, siùcáisede Cristo yàasu wenàiwicaca pía íbaidéeripiná Cristo irí càiripináta. ²³Dios iwèniacatécué pía cawèníri wawàsi iyú, yái Iiri íiranáca. Íná picácué píináidáanícawa ìwali yái èeri mìnanáí íimáanáca pìwali. Picácué nacái cáimacái piicáca píawawa iyúwa èeri mìnanáí. ²⁴Íná píacué nuénánáica, càmicaalícué báawa píibaidacalé, néese iwàwacutácué pìyaca mamáalàacata càide iyúwa pìyáanátécué Dios imáidacaalítécué pía.

²⁵Siùcade nùalàacué pía nàwali níara cà míiyéicáwaca icásàawa. Wáiwacali càmita imàaca nulí tàacáisi nuchùulianápiná nía quéwa nùalimá nùalàaca nía Dios iyúudàacáiná núa manuísíwata, iicácáiná nupualé, yéewanápiná nùalàaca wenàiwica cáalíacáiri iyú. ²⁶Nuínáidacawa cayábaca macáita wenàiwica nayamáacaalíwa càide iyúwa nùyáaná máinuta, manírta nacái macáicáinácué càulenápiná wàasu èeri siùcade, nàuwichàidapínacaalí wía Cristo ìwalíise, weebáidacáiná itàacái. ²⁷Quéwa cáinucaalí pía, picá pimàaca píichawa úa. Máinucaalí pía, cayábaca càmicaalí peedá píinuwa. ²⁸Quéwa peedácaalí píinupináwa, càmita pimàni píbáyawanáwa. Càita nacái mànacàu uedácaalí unírta, càmita cabáyawaná úa. Quéwa níái cáinufyéica, nía nacái caníríiyéica nàypiná càulenéri iyú cháì èeri irícu, iwàwacutáicáiná nàuwichàacawa Cristo irípiná. Íná nùalàacuéca pía ipíchanácué máini pìyaca càulenéri iyú.

²⁹Píacué nuénánáica càicué nuwàwaca nùalàaca pía: Iyaca wapíchalé achúma èerínata meedá, íná siùcade cawinácaalí idènièyéica yàacawéeriwa, iwàwacutá náibaidaca Wáiwacali irípiná càide iyúwa náalimáanáta cachàiníri iyú. ³⁰Càita nacái cawinácaalí achúméeyéica iwàwa yéénanáí yéetéeyéimiwa ìwaliwa iwàwacutá náibaidaca Wáiwacali irípiná càide iyúwa cà míiyéi achúma iwàwa.

Cawinácaalí nacái imàníyéica fiesta iwàwacutá nàyaca cáimiétaquéeri iyú càide iyúwa càmfíyéi máiní casímái iwàwa náibaidacaténá cáalfacáiri iyú Wáiwacali irípiná. Cawinácaalí nacái iwènièyéica wawàsi iwàwacutá càmita máiní cáinináca naicáca nàasuwa, néese iwàwacutá náináidacawa càide iyúwa canéeyéica yàasu, náibaidacaténá cachàiníiri iyú Wáiwacali irípiná. ³¹Cawinácaalí nacái imàníyéica yàasu wawàsiwa cháí èeri irícu needácaténá nalíwa plata, iwàwacutá càmita máiní báawaca nawàwa náináidáanicawa nàasu cawèníiri ìwaliwa cháí èeri irícuíríca, yácáiná mesúnamáita imáalàapínacawa macáita yái waiquéerica cháí èeri irícu.

³²Càmitacué nuwàwa pínáidáanicawa báawanama cháí èeri yàasu wawàsi ìwali. Máinucaalí asiali, yásí íináidacawa Wáiwacali yàasu wawàsi ìwali imànicaténá càide iyúwa Wáiwacali iwàwáaná casímáicaténá imànica Wáiwacali iwàwa. ³³Quéwa cáinucaalí asiali, yá iwàwacutá íináidacawa cháí èeri yàasu wawàsi ìwali casímáicaténá imànica ínu iwàwawa. Yái asiali càmita yáalimá íbaidaca macái ichàini iyúwa ínu irípináwa, Wáiwacali irípiná nacái. ³⁴Càita nacái maníríichúa, áiba inanái nacái càmfíichúaca icásàawa, náináidacawa Wáiwacali yàasu wawàsi ìwali, casímáicaténá namànica Wáiwacali iwàwa, namàacacaténá naináwa, náiwitáise nacáiwa Dios irí, náibaidacaténá cachàiníiri iyú irípiná. Quéwa áiba inanái caníríichúaca iwàwacutá uínáidacawa cháí èeri yàasu wawàsi ìwali usímáidacaténá uníriwa.

³⁵Càita nùalàacuéca pía nuyúudàacaténácué pía. Càmita numáisaníacué picàsàacawa, néese núumacué píri càì pìyacaténácué cáimiétaquéeri iyú, píibaidáanápínácué nacái Wáiwacali irípiná macái pichàini iyúwa.

³⁶Quéwa áibacaalí asiali íináidawa càmita cayába imáisaníacaalí mamáalàacata íduwa ucàsàacawa béerucáiná úa, uwàwacaalí ucàsàacawa nacái, yásí cayábaca úaniri imàacacaalí ucàsàacawa. Càmita namàni nàyaca nabáyawanáwa, níái icàsèeyéicawa. ³⁷Quéwa áibacaalí idènia íduwa, càmicaalí iwàwacutá ídu icàsàacawa asiali yáapicha, càmicaalí nacái uwàwa ucàsàacawa, úaniri nacái íináidacaalíwa càmínápiná imàaca ucàsàacawa yáapicha yái asialica, yá úaniri imànica iyaca cayábéeri wawàsi. ³⁸Iná cawinácaalí imàaquéerica íduwa icàsàacawa imànica cayábéeri wawàsi. Quéwa cawinácaalí càmfíríca imàaca ucàsàacawa imànita nacái cayábéeri yáwanái.

³⁹Uái caníríichúaca canáca yéewaná umàaca uíchawa uníriwa. Iwàwacutá uyamáacawa yáapicha idècunitàacá cáucani. Quéwa yéetácaalíwa uícha, yásí úalimáca udéca ucàsàacawa àniwa yáapicha

cawinácaalí asìali máinuírìca uwàwéerìca, quéwa iwàwacutá ucàsàacawa abéeri yáapìcha yeebáidéerìca Jesucristo itàacái. ⁴⁰Quéwa nuínáidacawa casímáinápiná cachàiníwanáí uwàwa càmicaalí uedá unìripináwa àniwa. Càita nuínáidacawa, nuebáida nacái Espíritu Santo Dios néeséeri idéca iyúudàaca nuínáidáanáwa càì.

Los alimentos consagrados a los ídolos

8 ¹Siúcade nucàlidacué piríni ìwali yáí pisutéericuéca péemìawa núa ìwali pìasu cuyàluta irìcuwa: yáí iinásì áìbanáí inuérìca iyúwa sacrificio nàacaténá ídolo cuwáinái yéenáìwaná icàaluíníná, càide iyúwa náìwitáise iyáaná, níara áìbanáica càmiyéica yeebáida Jesucristo itàacái. Pidécuéca píimaca cáalíacáicasacué pía macáita. Cayábacué nuénánái, ipìchanacué cáimacáica piicáca píawawa píalíacái ìwalíisewa. Cayába cachàiníwanáí cáininácaalícué piicáyacacawa, yéewanápinácué píiìwitáise idàwinàacawa Dios íiìwitáise iyú peebáidacaténácué itàacái tàì fíméeri iyú. ²Cawinácaalí iyúunáidéerìca yáalíacawa madécaná wawàsì ìwali, càmitàacá yáalíawa cayába càide iyúwa iwàwacutáaná yáalíacawa. ³Quéwa cawinácaalí cáinináca iicáca Dios, yásì Dios yáalí iicáca yáí wenàiwicaca, cayábaca Dios iicáca íiìwitáise nacái.

⁴Pisutácatécué péemìawa núa asásì cayábacaalícué piyáaca iinásì nanuérìca iyúwa sacrificio nàacaténá ídolo icàaluíníná, níái cuwáinái yéenáìwanáca. Càitacué núumaca pirí ìwali: Báisíta canéerìca iwèni meedáni, canáca nacái ichàini yáí ídoloca, cuwáisàiri yéenáìwanáca meedáni cháì èeri irìcu, canácáiná áìba báisíiri Dios íícha, abéerita yáí Diosca. ⁵Báisíta nàyaca madécaná demonio íiwacanánái cachàiníyèi báawéeyèi íiìwitáise icuèyèica yàasu cáliwa chènuníisèeri cáuli irìcubàa, cháì èeri irìcu nacái èeri mìnánái yèeyèica íipidená cuwáinái (íimáanáca diosnáì). Madécaná wenàiwica nàca demonio icàaluíníná, wenàiwica icàlidéeyèica ìwali cuwáináicasa nía. ⁶Quéwacué canáca walí áìba wèeripiná icàaluíníná íícha yáí abéerita Wáaniri Diosca. Wáaniri Dios imànicaté macáita, íná wawàwa wàyaca càide iyúwa iwàwáaná. Iya nacái abéerita Wacuèriná, yáí Wáiwacali Jesucristoca, yáí idàbéericaté macáita, àta wía nacái, Wáaniri Dios irípiná.

⁷Quéwa càmitacué macái wéená náalíá néemíaca cayába càinácaalí fímáaná yáí tàacáisica. Càmita cachàini náìwitáise Dios ìwali càmicáináca náalíá cayába. Níái wéenánái yéewánéeyèita yàaca ídolo cuwáisàiri yéenáìwaná icàaluíníná ipìchawáiseté nawènúadaca náìwitáisewa neebáidacaténá Jesucristo itàacái. Nayáacaalí nayáacaléwa áìbanáí

yáapicha, nawèniacaalí iinási nacái yàcalé irìcu, yá náaliacawa áibanái nadéca nanúaca yái pìràimica iyúwa sacrificio nàacaténá ídolo icàaluíniná. Abénaméeyéi wéená iyáacaalí yái iinásica, yá nayúunáidaca càmita báisi Dios imàaca nayáacani. Quéwa nayáacani quéwanáta. Iná nadàbaca nàináidacawa méetàuculé Dios ícha, yá báawaca náiwitáise ìwalíise yái namànínáca wawàsi nàináidéerica Dios imáisaníaca namànica. ⁸Báisíta càmita cayába Dios iicáca wía ìwalíise meedá yái wayéerica, iná càmita cayábáwanái Dios iicáca wía áiba wawàsi ìwalíise wayáacaalíni. Càita nacái càmita báawa Dios iicáca wía ìwalíise yái cànírica wayáa. ⁹Quéwacué éwita Dios imàacacáaníta piyáaca iinási áibanái inuérica iyúwa sacrificio ídolo cuwáisàiri yéenáwaná irí, càicáaníta iwàwacutácué piicá píchawa cayába ipíchanácué abéeri wéenasàiri cànírica yeebáida tàì ímèeri iyú imànica ibáyawanáwa iicácáinácué piyáacani, yái iinásica. ¹⁰Píacáiná yáaliéricawa Dios imàacaca piyáaca yái iinásica, néese píawinacaalíwa piyáacaténá piyáacaléwa ídolo yàasu templo néré, nawacùacataléca iinási nanuérimica iyúwa sacrificio ídolo irí, yá cawàwanáta abéeri wéená càníri yeebáida tàì ímèeri iyú iicáca pía néré, néese iwàlùacawa néré nacái iyáacaténá yái iinásica, éwita íináidacáanítawa càmita Dios iwàwa imànica càì. ¹¹Pidéca píimaca píwaliwa píalíánásawa madécaná, quéwa yái píalíacáica càmita iyúudàa péenásàiri yái cànírica yeebáida tàì ímèeri iyú, néese pidéca pímanica irí máini báawéeri píalíacái iyúwa, yá cawàwanáta yéetápinácawa méetàuculé Dios ícha ibáyawaná yáapichawa, yái péenásàirica, éwitaté Cristo yéetácáanítawa nacái íchawalíná. ¹²Iná péewáidacaalícué péenánáwa càníiyéica yeebáida tàì ímèeri iyú namànínapíná áiba wawàsi nàináidéerica ìwali cànírica Dios iwàwa namànica, yá pímanícuéca píacawa píbayawanáwa péenánái iríwa, Cristo irí nacái. ¹³Iná yái nuyáanáca iinási imàacacaalí nuénásàiri imànica ibáyawanáwa nuyáacalé ìwalíise, yási cayába cachàiníwanái cànínapíná quirínama nuyáaca iinási, ipíchaná núalimáidaca nuicáwa nuénásàiriwa àta imànicataléta ibáyawanáwa.

Los derechos de un apóstol

9 ¹Ewita apóstolcáaníta núa, yái Dios ibànuérica, càicáaníta càmita nuèpuníwa càide iyúwa isímáidáaná núa meedá, néese nuwàwaca nuyúudàaca áibanái. Báisíta Dios imàacacaté núa apóstolpiná, iná canáca ichùulièri núa cháì èri irìcu. Nudéca nuicáca Wáiwacalí Jesús. Píacué

nacái yáasáidéeyéica apóstolca núa bàaluitécáiná piwènúadacuéca píiwitáisewa Dios irípiná nuífbaidacaalíté Wáiwacali irípiná pèewibàa, nucàlidáanápínacué pirí iináwaná ìwali. ²Cawàwanáta áibanái càmita naicá núa càide iyúwa apóstol, yái Dios ibànùèrica, quéwa pialíacuéwa báisiiri iyú apóstolca núa, bàaluitécáiná piwènúadacuéca píiwitáisewa peebáidacatená Wáiwacali itàacái, nucàlidacaalítécué pirí iináwaná ìwali. Càita Dios yáasáidacuéca pirí apóstolca núa.

³Natàanícaalí báawéeri iyú nùwali, náimacaalí nacái càmitasa apóstolca núa, yásí càì núuma nalíwa: ⁴Dios ibànùacaté núa iyúwa apóstol nucàlidacatená Wáiwacali iináwaná, íná Dios imàacaca nusutáca nuyáapínáwa wenàiwicanái íicha yeebáidéeyéica Jesucristo itàacái. ⁵Dios imàaca nacái macái apóstol idèniaca ínuwa yeebáidéechúa Jesucristo itàacái, imàaca nacái apóstol itéca yáapichawa úa idècunitàacá yèepunicawa icàlidacatená Dios itàacái, càide iyúwa áibanái apóstol namàníná, nía nacái Wáiwacali yéenanái iméeréerináica, Pedro nacái. Iná nudèniacaalí nuínuwatá, yá cayábaca nutéca núapichawa úatá. ⁶Dios imàaca nacái Bernabé, núa nacái wayamáidaca wáibaidaca wacáapi iyúwa, wasutácaténacué píicha wayáapínáwa idècunitàacá wacàlidaca pirícué Dios itàacái. Quéwa éwita Dios ibatàacáaníta wamànica càì, càicáaníta càmítaté wasutácué píicha wayáapínáwa, néese wíata ipáyaidatèni. ⁷Péemiacué comparación: Píalíacuéwa úwinái càmita nawènì náyáapínáwa. Càita nacái wenàiwica ibànacaalí ibànacalewa abéyéeri uva yéetaná, càmita iwàwacutá ipáyaidaca iyáacatená yàasu uva iyacanáwa. Càita nacái abéeri icùacaalí áibanái ipìra ovejanái, canáca imáisanìeri ìiraca leche yeedéerica ovejanái íicha. Càita nacái Dios imàacaca apóstolnái isutáca iyáapínáwa wenàiwicanái íicha yeebáidéeyéica Jesucristo itàacái Dios ibànùacáiná apóstolnái nàatalé. ⁸Picácué píináidawa núumáanáca càiri tàacáisi nuíwitáise iyúwa meedá, bàaluitécáiná Dios càì íimaca imàacacaalíté itàacáíwa profeta Moisés irí, Moisés icàlidacatenáté israelitanái iríni. ⁹Càité Moisés itànàaca tàacáisi bàaluité Dios inùmalicúise: “Picácué pidacùa pacá inùma ituínási íicha idècunitàacá uífbaidaca pirí ubawàidaca ituínási, ùlùacatená ituínási iwìralè, néese pimàacacué uyáacani idècunitàacá uífbaidaca uèpunicawa”, íimaca. Dios íimacaté càì walí wáalíacatenáwa catúulécánáca iicáca pacá, quéwa iwàwacutácué wáalíacawa áiba wawàsi quiríta. ¹⁰Dios íimacaté càì icàlidacatená walí iwàwacutáanáca wayúudàaca wenàiwica iyúudèeyéica wía. Dios ichùulíacaté Moisés itànàanápínaté yái tàacáisi wamànicatená cayábéeri nalí cawínácaalí

yéewáidéeyéica wía Dios itàacái iyú. Péemiacué comparación: Asiali ichùniacaalí cáli nabàncatáipíná, yá iwàwacutá namàacaca yeedáca yàasupínáwa quíiracaalí yái ìyacanásica. Càita nacái cawinácaalí yùuluèrica ituínási iwíralè, iwàwacutá namàacaca yeedáca yàasupínáwa. Càita nacái wía yéewáidéeyéicuéca pía, Dios imàacaca wasutácuéca píicha wayáapínáwa. ¹¹Wabàncatécué Dios itàacái piwàwalìcu, íná cayábaca wasutácué píicha weedácaténá wàasupínáwa, yái wayáapíná, wabàlepiná nacái, wayamáacatáipíná nacái cháì èeri írìcu. ¹²Dios imàacacáiná áibanái yéewáidéeyéicuéca pía isutácuéca píichani, yá máiní cachàiníwanái Dios imàaca wasutácuéca píichani, wíacáináaté idàbàanéeyéicaté icàlidacuéca pírí Jesucristo iináwaná. Quéwa, éwita Dios imàacacáanáta wasutácuéca píicha wayáapínáwa, càicáanáta càmita càì wamànica. Néese wàidenìacaté wàuwichàanáwa wáibaidaca wawèniánápiná wayáawa ipíchanácué báawaca péemíaca Cristo itàacái ìwalíise yái wasutáanácuéca wayáapínáwa píicha.

¹³Píalíacuéwa naináwaná ìwali, cawinácaalí íbaidéeyéica templo írìcu. Needáca nayáawa templo írìcuíse. Iimáanáca, cawinácaalí inuéyéica pírái iyúwa sacrificio, needáca nalíwa iinási yéenáimi, macái pírái yéená nanuérica neemácaténáni altar íinata. ¹⁴Càita nacái Wáiwacali idéca ichùuliaca cayábàanápiná nàyaca náibaidacalé ìwaliwa namànírìca Dios írìpiná, cawinácaalí icàlidéeyéica yái tàacáisi cayábéerica, íná cayábaca nasutáca nayáapínáwa wenàiwicanái fícha yeebáidéeyéica Wáiwacali itàacái. Yácata nawèni, níái icàlidéeyéica Dios itàacái. ¹⁵Quéwa canácatáita càì numànité nùyacaalítécué píápícha, càmita nacái nutànàacué pírí cuyàluta siùca piàcaténácué nulí wawàsi. ¡Máiní casímáica nuwàwa nucàlidacué pírí Dios itàacái mawèníiri iyú! ¡Cayába cachàiníwanái nulítáni nuétacaalíwatá ipíchaná nuyamáidaca nucàlidaca Dios itàacái mawèníiri iyú!

¹⁶Càmita cachàini nuicá núawawa ìwalíise yái nucàlidáanáca Cristo iwasàaca wenàiwica Dios yàasu yùuwichàacáisi fícha. Néese nucàlidacani Cristo ichùuliacáiná núa. ¡Máiní báawéeri yùuwichàacáisi yàanèeripínáca nùwali càmicaalí nucàlida yái tàacáisica wenàiwicanái írì! ¹⁷Iná nucàlidacaalíté yái tàacáisica nuíwitáise iyúwa meedátá, yá nuedácaté wenàiwicanái fícha nuwènipínáwatá. Quéwa càmita nucàlidani nuíwitáise iyúwa, néese Dioscata yái ichùulièrica nucàlidacani. ¹⁸Yácata nuwèni yái: Casímáica nuwàwa nucàlidacáiná mawèníiri iyúni yái tàacáisica íméerica Cristo iwasàaca wenàiwica Dios yàasu yùuwichàacáisi fícha. Càita nucàlidaca mawèníiri iyúni: Ewita Dios

imàacacáaníta nusutácué píicha nuyáapínáwa nucàlidacáinácué pirí itàacái, càicáaníta càmita càì nusutácuéca píichani.

¹⁹Ewita càmicáaníta áibanái yàasu wenàiwica núa íbaidéerica mawèníri iyú, càicáaníta numàacaca núawawa càide iyúwa macái wenàiwicanái yàasu wenàiwica íbaidéerica mawèníri iyú nuyúudàanápíná áibanái wenàiwica manùbéeyéi nawènúadàanápíná náiwitáisewa Cristo irípiná. ²⁰Nùyacaalí judíonái yáapicha, yá nùyaca càide iyúwa náiwitáise iyáaná nuyúudàacaténá nawènúadaca náiwitáisewa Cristo irípiná. Càita nacái numànica nùyacaalí náapicha níái cà míiyéica judío yebáidéeyéica tàacáisi Dios imàaquéericaté profeta Moisés irí bàaluité; yá nùaca Dios icàaluíniná náapicha càide iyúwa náiwitáise iyáaná, yéewacaténá néemiaca nucàlidaca nalí Cristo iináwaná ìwali, éwitacué càmicáaníta iwàwacutá wamànica càide iyúwa Moisés yàasu tàacáisi ímáaná wàacaténá Dios icàaluíniná, wía yebáidéeyéica Cristo itàacái. ²¹Càita nacái nùyacaalí náapicha níái cà míiyéica judío, cà míiyéica ìya Moisés yàasu tàacáisi ìwali, yá càmita numàni iyúwa wenàiwica imànírira càide iyúwa Moisés yàasu tàacáisi ímáaná, nuwàwacáiná nuwènúadaca náiwitáise Cristo irípiná. Quéwa éwita càmicáaníta numàni càide iyúwa wenàiwica iyéerica càide iyúwa Moisés yàasu tàacáisi ímáaná, càicáaníta nuebáidaca mamáalàacata Dios itàacái càide iyúwa Cristo ichùulianá núa. ²²Nùyacaalí áibanái yáapicha cà míiyéica yebáida tàì íméeri iyú, yá nuèpua nùyaca càide iyúwa abéeri néená, nuicá nacái cáimiétaquéeri iyú yái nánáidáanácawa, càmita nuicáaní naquíniná. Càita nùyaca náapicha nuyúudàacaténá neebáidaca Jesucristo itàacái cachàiníwanái. Iná núalimáidaca nùyaca abédanamata náapicha macái wenàiwica íiwitáaná numànicaténá àta càinácaalí núalimáanáta numànica nuyúudàacaténá abénaméeyéi nawènúadaca náiwitáisewa Cristo irípiná yéewacaténá iwasàaca nía Dios yàasu yùuwichàacáisi íicha. ²³Càita numànica yéewacaténá madécaná wenàiwica yéemiaca yái tàacáisi cayábéerica íméerica Cristo iwasàaca wenàiwica Dios yàasu yùuwichàacáisi íicha, nuwàwacáiná nacái Dios imànica nulí cayábéeri náapicha níái yebáidéeyéica Cristo.

²⁴Péemiacué comparación: Píalíacuéwa ìwali yái napianíinácawa carrera ìwali, yá macáita napianícawa, quéwa abéerita yái imawèniadéerica áibanái yeedáca iríwa cawèníri. Càide iyúwa níái ipianíiyéicawa cachàiníri iyú carrera ìwali, càita nacái iwàwacutácué píibaidaca Dios irípiná cachàiníri iyú, píalimáidacué macái pichàini iyúwa pimànicaténá càide iyúwa ichùulianácué pía. Càicué pimàni peedácaténácué piríwa yái

cawènírica Wáiwacali yèeripináca yàasu wenàiwicanáí iríwa chènuniré. ²⁵Cháí èeri irícu macáíta iwàwéeyéica isàiwicaca deporte needácaténá nalíwa cawèníri, néewáidacawa cachàiníri iyú yéewacaténá cachàinica nainá; namàacaca náichawa macáí wawàsi imànírica báawéeri nainá irí. Yá néewáidacawa cachàiníri iyú needácaténá nalíwa abéeri corona, laurel ibáiná icàyuwaniná. Quéwa báinásíri corona yèepùaca chuica ráunamáita, yá imáalàacawa, néese wía yeebáidéeyéica Jesucristo itàacáí wáibaidaca cachàiníri iyú Wáiwacali iripináwa weedácaténá walíwa áiba cawèníri cànírica imáalàawa iyéerica chènuniré. ²⁶Núacata càníri iyúwa matuíri ipianícaalíwa éeruwaca, càmita nacáí iyúwa áiba inúadáidéeri cáuli meedá. Néese núalíacawa càinácaalí Wáiwacali iwàwáaná numànica, yá nuíbaidaca cachàiníri iyú Wáiwacali iripiná. ²⁷Nucùaca núawawa, nuiná nacáíwa cachàiníri iyú ipíchaná numànica nubáyawanáwa, ipíchaná nacáí numànica áiba wawàsi cànírica iyúudàa áibanáí, càmicáiná nuwàwa Wáiwacali imáisaníaca nuíbaidáanápíná irí quirínama idécanáami nuéwáidaca áibanáí.

Consejos contra la idolatría

10 ¹Píacué nuénánáica, picácué piimáicha macáí wàawirináimi israelitanáí namusúacatéwa profeta Moisés yáapicha Egipto yàasu cáli íicha. Néeseté idècunitàacá nèepunícawa nàacawa manacúali yùucubàa càinàwàiri, yáté Dios imàacaca manuíri acalèe yàacawa napíchalépiná yáasáidacaténáté alénácaalí iwàwacutá nàacawa. Macáíta nèepunícatéwa acalèe yáapíise, catámèeri irícu ùulèeri íicha. Macáítaté nàacawa Moisés yáapicha, yá nachàbacatéwa chuìri cáli íinatabàa Mar Rojo yàasu manuíri úni ìwaliabàa. ²Càité macáíta abédanama namànicaté náiwitáisewa Moisés yáapicha namànicaténáté iyúwa Moisés ichùulianá nía càide iyúwaté nadéca nacáicaalí nabautizácawa nèepunícáinátéwa Moisés yáapicha acalèe yáapíise, úni ìwaliabàa nacáí. ³Càité nacáí macáíta nayáacaté chènuniíséeri yàacàsi Dios yèericaté nalí, yáí pan nacáirica íipidenéericaté maná. ⁴Macáíta nacáí nàiracaté úni Dios imàaquéericaté imusúacawa íba yèewíise. Yáí Cristo yàacawéeridéericaté yèepunícawa nía, càicanide iyúwa cachàiníri íba Cristo yàacáinaté nacáuca. ⁵Quéwaté báawaca Dios iicáca náiwitáise batéwa macáíta, ínáté Dios inúaca nía, yá nachéecami icàlàliacatéwa manacúali yùucubàa càinàwàiri.

⁶Càité nachàbacawa. Dios yùuwichàidacaté nía yéewáidacaténá wía ipíchaná wawàwaca báawéeri càide iyúwaté nawàwáaná báawéeri.

7Iná picácué pía ídolo cuwáinái yéenáiwana ícàaluíniná càide iyúwaté abénaméeyéi nanúanaté pírái, nayáaca nacái iinási nàacaténá ídolo ícàaluíniná. Càité profeta itànàaca Dios itàacái ímérica: “Níara wenàiwicaca náawinacatéwa nayáacaténá iinási, yáté nàiraca nacái, néese namichàacatéwa nasàiwicacaténá náapichawáaca, yá naimáca náapichawáaca”, ímaca. 8Píacué nuénánái, picácué waimá áiba yáapicha càmfíchúaca wáinusíwa, càmfíríca nacái wanírísíwa, càide iyúwaté abénaméeyéi imàníináté. Yáté veintitres mil namanùbaca néetácawa Dios inúacáináté nía nabáyawaná ìwaliise. 9Picácué nacái wáalímáida waicáwa Cristo càide iyúwaté abénaméeyéi namàníináté nabáyawanáwa mamáalàacata néese Dios yùuwichàidacaté nía. Yáté néetácawa àapi iyú Dios ibànuèyéica nèewiré. 10Picácué picuísá pífchawa Dios càide iyúwaté abénaméeyéi nacúsfáidacaté Dios, yáté Dios ibànùaca yàasu ángelwa inuérica wenàiwica, yá inúacaté nía.

11Càité ichàbacawa. Dios yùuwichàidacaté wàawirináimi yéewáidacaténá wía ipíchaná wamànica càide iyúwa namàníináté. Néeseté áibanái profeta natànàacaté Dios itàacái nàalàacaténá wía ipíchaná wamànica wabáyawanáwa, wía iyéeyéica siùcade ipíchawáise èeri imáalàacawa. 12Iná pínáidacaalícuéwa cachàinica píiwitáise, cáalíacáiri nacái, iwàwacutácué piicá píchawa cayába ipíchaná picaláacawa Dios ícha pimànicáichacué pibáyawanáwa. 13Pidàbacaalícué piwàwaca pimànica pibáyawanáwa, néese piwàwalícué macái èeri mìnánái nachàbaca càiri wawàsi yáalímáidéerica nía namàníinápíná nabáyawanáwa. Quéwa cayábéeri Dios íiwitáise, imànírica nacái machacàníiri iyú càide iyúwa ímáaná, yá iyúudàapínácué pía ipíchaná pimànica pibáyawanáwa. Iná yéewa pialímácué manuíca pínáidacawa piwàwawa Dios ìwali càmfínápínácué imàaca càulenéri wawàsi yáalímáidaca pía cachàiníwanái ícha yái pialíméericuéca pìideníaca. Néese càulenéri wawàsi yáalímáidacaalícué pía pimàníinápíná pibáyawanáwa, yásí Dios iyúudàacué píawa yéewacaténá pìideníaca mamáalàacatani ipíchanácué pimànica pibáyawanáwa. Càipíná Dios iyúudàapínácué píawa, íná càmitacué iwàwacutá pimànica pibáyawanáwa.

14Iná píacué nuénánái nuwàwéeyéica, picácué píacawéerida wenàiwica yèeyéica ídolo cuwáinái yéenáiwana ícàaluíniná. Piyacué déeculé náicha cawinácaalí imàníiyéica càì. 15Núalíacawa cáiwitáiseecuéca pía, íná nutàanicué pírí nuwàwacáinácué pínáidacawa cáalíacáiri iyú ìwali yái núuméericuéca pírí. Yásí pialíacuéwa báisícatani. 16Macái imanùbaca wamànicaalí Santa Cena, yá wasutáca Dios ícha cayábacaténá imànica

walí uva ituní, wàa nacái Dios irí ìwali cayábéeri, yácáiná uva ituní ímáanáca càicanide iyúwa Cristo íraná imusuéricatéwa ícha cruz ìwali wáichawalíná. Macái imanùbaca wàiracaalí yái uva ituníca, yá wáasáidaca wàyaca abédanamata Cristo yáapicha, yéetácáinátéwa cruz ìwali wáichawalíná. Macái imanùbaca wayáacaalí wáalimáwanama pan yéená wasubèriadéerica, yá wáasáidaca wàyaca abédanamata Cristo yáapicha, Cristo iiná yùuwichàacáinátéwa cruz ìwali wáichawalíná. ¹⁷Ewita manùbéeyéicáaná wía, càicáaná macáita wayáaca abéeri pan yéená macáita wamanùbaca iyúwa. Càita wáasáidaca abédanamata wáiwitáise wáapichawáaca wàyacáiná abédanamata Cristo yáapicha, éwita manùbéeyéicáaná wía.

¹⁸Piwàwalicué Dios ichùuliacaté Israel itaquénáinámi bàaluité. Abédanamata namànica náiwitáisewa náapichawáaca nayáacaalíté iinási macáita namanùbaca iyúwa, yái pìráimi nanuéricaté iyúwa sacrificio cáuri Dios irí. ¹⁹Càmita núuma nàaca Dios icàaluíniná cawinácaalí inuényéica pìrái iyúwa sacrificio ídolo irí. Càmita báisí cáurica yái ídolo cuwáisàiri yéenáiwanáca, íná canáca iwèni meedá. Yá nacái pìrái iinámi neeméerica ídolo irí, cànírita cachàini áiba iinási íiwitáaná ícha. ²⁰Néese nuwàwacué píalíacawa nàwali níara áibanái yèeyéica ídolo icàaluíniná. Namàaca iinási iyúwa sacrificio ídolo irí, quéwa càmita nàa Dios icàaluíniná, néese nàaca demonio icàaluíniná. Iná càmitacué nuwàwa piyáaca náapichani idècunitàacá nàaca ídolo ímiétacaná fiesta irícu, ipíchanácué piyaca abédanamata demonio yáapicha, náapicha nacái níara yèeyéica demonio icàaluíniná. ²¹Càmitacué Dios imàaca pìiraca uva ituní Santa Cena yaalí Wáiwacali yàasu copa irícuíse, pìiracaalícué nacái demonio yàasu copa irícuíse. Càita nacái càmitacué Dios ibatàa piyáaca piyáacaléwa Santa Cenaca Wáiwacali yàasu mesa iwéré, piyáacaalícué piyáacaléwa nacái demonio yàasu mesa iwéré, aléera namànicataléca fiesta nadécanáami nanúaca pìrái iyúwa sacrificio nàacaténá ídolo cuwáiná yéenáiwaná icàaluíniná.

²²¡Picácué wamàni càì ipíchanácué máini báawaca Wáiwacali iicáca wáiwitáise! ¡Picácué wayúunáida cachàiníwanáica wía Wáiwacali íchawa! Canáca yéewaná wamànica irí càiri báawéeri wawàsi.

La libertad y el amor cristiano

²³Abénaméeyéi nacàlidaca: “Càmicaalí Dios imáisanía wamànica áiba wawàsi, yásí cayábaca wamànica càinácaalí wawàsi wawàwéerica wamànica”, càì náimaca. Quéwa núumacué pìrí, éwita Dios càmicáanáita

imáisanìa wamànica áiba wawàsi, càicáaníta càmita macái wawàsi iyúudàa wía, áibanái nacái. Báisíta Dios imàacaca wamànica càide iyúwa wawàwáaná, càmicaalí báawa yái wawàwéerica wamànica, quéwa càmita macái wawàsi imàaca wáiwitáise idàwinàacawa Dios íiwitáise iyú weebáidacaténá itàacái tàì fíméeri iyú, wayúudàacaténá nacái áibanái neebáidáanápíná. ²⁴Picácué wacutácáita wasímáidáanápíná wíawawa meedá, néese wacutácué wayúudàacaténá áibanái nadàwinàidaca náiwitáisewa Dios íiwitáise iyú àta neebáidacataléta itàacái tàì fíméeri iyú.

²⁵Piyáacué macáita cawinácaalí iinásica piwènièricuéca nawéndacataléca iinási; picácué pisutá péemiawa nía iwéndéeyéicani píalífacaténácuéwa asásí áibanái inúacaalíté yái píráimica nàacaténá ídolo cuwáinái yéenáiwaná icàaluíniná, achúmacáichacué piwàwa ìwali. Dios imàacacué piyáacani íná piwèniacué matufbanáiri iyúni. ²⁶Càmítacué iwàwacutá achúmaca piwàwa yàacàsi ìwali Wáiwacali yàasucáiná macái wawàsi èeri irícuírca.

²⁷Néese áibacaalí càmfíri yeebáida Jesucristo itàacái, imáidacaalícué piyáaca piyáacaléwa yáapicha, piwàwacaalícué nacái piyáaca yáapicha, néese piyáacué macáita yàacàsi yèericuéca piyáa. Picácué nacái pisutá péemiawa nía iinási ìwali píalífacaténácuéwa asásí áibanái inúacaalíté yái píráimica iyúwa sacrificio nàacaténá ídolo cuwáinái yéenáiwaná icàaluíniná, achúmacáichacué piwàwa. ²⁸Quéwa áibacaalícué càì yàalàaca pía: “Yái iinásica, nadéca nanúacani iyúwa sacrificio nàacaténá ídolo cuwáinái yéenáiwaná icàaluíniná”, càicaalícué fíma pírí, néese picácué piyáani pimànicáichacué báawéeri irí yái yàalèericuéca pía ipíchaná iwènúadaca íiwitáisewa Dios íicha, càmicáiná yeebáida tàì fíméeri iyú néese iyúunáidaca Dios imáisanieràica wayáaca yái iinásica. ²⁹⁻³⁰Abenaméeyéi càmitàacá neebáida tàì fíméeri iyú, íná machawàacaca náináidacawa. Cáaluca namànica wawàsi càmfíricué cáalu pimànica, càmicáiná nàalíawa cayába càide iyúwacué píalíánáwa. Nayúunáidaca báawáanápíná Dios iicáca nía yàacàsi ìwalíise. Quéwa cawàwanátacué piwàwa càì píimaca nulí: “Dios idéca imàacaca numànica càide iyúwa nuwàwáaná càmicaalí báawa yái nuwàwéerica numànica, íná canáca yéewaná áiba imáisaníaca numànicani achúmacáicha meedá iwàwa. Nudéca nùaca Dios irí cayábéeri yàacàsi ìwali, íná canáca yéewaná áiba itàaníca báawéeri iyú nùwali nuyáacalé ìwalíisewa”, càicué piwàwaca píimaca cawàwanáta. ³¹Báisíta, quéwa péemiacué nulí, nuénánái. Càinácaalícué wawàsi piyáaca, càinácaalícué wawàsi nacái

pimànica, pimànicué abéerita yái imàaquéerica áibanái iicáca Dios cáimiétaquéeri iyú. ³²Picácué pimàni wawàsi càì áibanáicaalícué iicá pimànicani yá nacaláacawa Dios ícha, yá namànica nabáyawanáwa, macáita cawinácaalí nía, judíocaalí nía, càmiíyéicaalí judío nía, nía nacái Dios yàasu wenàiwica yeebáidéeyéica Jesucristo itàacái. ³³Núa nacái, àta càinácaalí numànica, núalimáidaca nuyúudàaca macái wenàiwica íiwitáaná. Càmita nucutá numànicaténá abéerita yái isíimáidéeripiná núa, néese nucutáca numànicaténá yái iyúudèeripináca manùbéeyéi wenàiwica, yéewanápiná nawènúadaca náiwitáisewa Cristo írípíná iwàsàcaténá nía Dios yàasu yùuwichàacáisi ícha.

Las mujeres en el culto

11 ¹Piyacué nacái càide iyúwa nùyáaná càide iyúwa nacái Cristo iyáanáté. ²Píacué nuénánáica, iyéeyéica Corinto iyacaléná írìcu, nadéca nacàlidacuéca nulí piináwaná ìwali. Cayábéeriquéi piwàwalínacuéca núa mamáalàacata, pimànicuéca nacái mamáalàacata càide iyúwa nucàlidáanátécué pirí tàacáisi. ³Quéwa nuwàwacué píalíacawa áiba wawàsi: Càide iyúwa Dios ichùulianá Cristo, yá Cristo yeebáidaca Dios itàacái, càita nacái Cristo ichùulíaca macái asianái yeebáidéeyéica itàacái; néese càide iyúwa Cristo ichùulianá macái asianái yeebáidéeyéica itàacái, yá neebáidaca itàacái, càita nacái macái asianái idènièyéica ínuwa iwàwacutá nachùulíaca náinuwa, yá iwàwacutá nacái inanái neebáidaca nàacawéeri itàacáíwa. ⁴Asiali ibàliacaalí íiwitawa idècunitàacá isutáca yáawawa Dios ícha, icàlida nacái tàacáisi Dios inùmalícuíse, càmita yàa Cristo íimiétacaná. ⁵Quéwa càmicaalí inanái ibàlià uíwítawa idècunitàacá usutáca Dios ícha, ucàlida nacái tàacáisi Dios inùmalícuíse, càmita ùa unìri íimiétacanáwa, néese càica úade iyúwa inanái nàuwisèechúaca ícha íiwita ibáiná macáita. ⁶Càmicaalí inanái ibàlià uíwítawa, iwàwacutá udalúaca uíchawa uíwita ibáináwa. Quéwa báicaalí udalúaca uíwita ibáináwa macáita, iwàwacutá ubàliaca uíwítawa. ⁷Iwàwacutá asiali càmita ibàlià íiwitawa. Dios idàbacaté idàbáanéeri asiali quéechatécáwa iyúwa Dios iicácanáwa, íná iwàwacutá asianái yáasáidaca cachàinírica Dios íiwitáise. Quéwa iwàwacutá inanái yáasáidaca cáimiétacanáca unìri. ⁸Bàaluitécáiná Dios idàbacaalíté idàbáanéeri asialica, càmitaté Dios iwènúada inanái ibàlài yáapi asiali iyú ùacawéeripiná, néese Dios yeedácaté asiali ibàlài yáapi, yá iwènúadacaté yáapi inanái iyú asiali yàacawéetúapiná. ⁹Càmitaté Dios imàni asiali inanái írípíná. Néese Dios

imànicaté inanái asìali irípiná. Iná iwàwacutá inanái uebáidaca unìri itàacáíwa. ¹⁰Dios imànicaté inanái asìali irípiná, íná iwàwacutá inanái ubàliaca úfwitawa, ángelnái iicácáiná úa. ¹¹Quéwa wía yeebáidéeyéica Jesucristo itàacái, cáinináca Dios iicáca wía abédanamata: Asìanái càmita nàya isicúa canácaalí inanái, càita nacái inanái càmita nàya isicúa canácaalí asìali. ¹²Ewitaté Dios iwènúadacáaníta asìali ibàlài yáapi idàbáanéechúa inanái iyú, asìali yàacawéetúapíná, càicáaníta siùcade asìanái imusúaca iicá èeri inanái fícha. Quéwa Dios idàbacaté macáita, wía èeri mìnánaica.

¹³¿Càinásicué piínáidacawa? ¿Cayábasica inanái usutácaalí Dios fícha càmicaalícáwa ubàlì uífwitawa? ¹⁴¿Càmitasica macáita wáaliacawa cáalacaalí asìali íiwita ibáiná idàwinàcawa, yásí báawaca áibanái iicácani? ¹⁵Quéwa cáalacaalí inanái íiwita ibáiná idàwinàcawa, yá casímáica uicácani, úaliacáináwa Dios imàacaca ulí uífwita ibáiná uépùcaténá uífwitawa iyú. ¹⁶Quéwa abénaméeyéi péenácué iwàwacaalí itàaníca chàinisíiri iyú ìwali yái tàacáisica, càmicáiná nawàwa namànica càide iyúwa núumáanácué pirí, yá nùalàaca nía cachàiníiri iyú namànínápiná iyúwa núumáaná. Wía apóstolca, macáita nacái Dios yàasu wenàiwicaca yeebáidéeyéica Jesucristo itàacái, càmita wamàni càiri méetàuculéeri wawàsi, iyúwacué pimàniiná.

Abusos en la Cena del Señor

¹⁷Siùcade nutànàacué pirí áiba wawàsi ìwali, quéwacué càmita nùalimá núumaca cayábéeri piwali càmicáinácué pimàni cayába. Macái imanùbaca pìwacáidáyacacaalícuéwa, yá pimànicuéca báawéeri piríwáaca, càmitacué piyúudàayacawa. ¹⁸Quéechacáwa nuwàwacué nutànàaca piríni iyúwa áibanái icàlidáanácué piínáwaná ìwali. Càì náimaca: Pìwacáidáyacacuécawa pimànicaténá culto, quéwa càmitacué abédanama píiwitáise, íná piwènúadacuéca píiwitáisewa píichawáaca. Batéwa nuínáidacawa báisícani yái náimáanácuéca piwali. ¹⁹¡Pìwènúadacuéca píiwitáisewa píichawáaca cachàinicáinácué piicáca píawawa píichawáaca piwàwacáinácué áibanái nánáidacawa abéericatacué pía níai yeebáidéeyéica Cristo itàacái báisíiri iyú! ²⁰Piseríacuécawa píichawáaca, íná éwitacué pìwacáidáyacacáanítawa, càicáaníta càmitacué pimàni Santa Cena machacàníiri iyú càide iyúwa Wáiwacali iwàwáaná. ²¹Yàanàacáiná yàasu èericatái piyáacaténá piyáacaléwa píapichawáaca ipíichawáise pimànicuéca Santa Cena, yá ráunamáita piyáacuéca piyáacaléwa méetàucunamata píichawáaca,

yái yàacàsi pitéericuéca píapichawa. Néese áibanái catúulécanéeyéica yàanèyeyéicué píamísewa canéeyéica irí yàacàsi natéeripiná, yá máapica nía, quéwa áibanái càasuíyéi nacàmaca nàiracáiná manuí uva ituní. ²²Píacué càasuíyéica, ¿cánácué càmita piyáa piyáacaléwa picapèericutawa ipíchawáiseuécua pìanàca? ¿Cánácué báawa piicáca Dios yàasu wenàiwica yeebáidéeyéica Jesucristo itàacái? ¿Cánácué pibáiniada catúulécanéeyéi wenàiwica canéeyéica irí yàacàsi natéeripiná? Piyúunáidacuécua nucàlidáanápina píri pimànicuécua cayábéeri. ¡Càmíirita! ¡Càmítacué pimàni cayábéeri!

La Cena del Señor

²³Bàaluité Wáiwacali yéewáidacaté núa càinácaalí iwàwacutáana wamànica yái Santa Cenaca. Càita nacái nuéwáidacatécué pía: Yátaté catáca, ipíchawáiseté Judas itéca úwinái Wáiwacali Jesús yàatalé náibàacaténani, yá Wáiwacali yeedáca pan icáapi irículéwa. ²⁴Néese idécanáamité yàaca Dios irí cayábéeri pan iwali, yá isubèriadacani. Yá íimaca: “Yácata nuiná yái, yéetéeripinácuécawa píchawalíná ipíchánácué Dios yùuwichàidacuécua pía pibáyawaná ìwalísewa. Piyáacuéni yái panca piwàwalíripinácué càinácaalí nuétácawa píchawalíná”, íimaca yái Wáiwacalica. ²⁵Càité nacái idécanáamité nayáca nayáacaléwa, yá Jesús yeedáca copa icáapi irículéwa, abéechúa copa idènièchúa irícuwa uva ituní. Yá íimaca: “Yái uva ituníca, yácata nuíraná imusuéripinácué nuíchawa cruz iwali píripinácué, ipíchána Dios yùuwichàidacuécua pía pibáyawaná ìwalísewa. Yái uva ituníca yáasáidacuécua píri báisíiricani yái wàlisài wawàsi Dios imàníirica wenàiwicanái yáapicha iwasàcaténá nía Dios yàasu yùuwichàacáisi fícha. Macái imanùbaca pìiracaalícuéni, piwàwalícué càinácaalí nuétácawa píchawalíná”, íimacaté yái Wáiwacalica. ²⁶Iná nuénánái, piyáacáinácué yái panca, pìiracáinácué nacái yái uva ituníca, íná píasáidacuécua píacawa áibanái irí càinácaalíté iyú Wáiwacali yéetácawa wáichawalíná cruz iwali. Pimànicué càì àta Wáiwacali yàanàacataléta àniwa.

Cómo se debe tomar la Cena del Señor

²⁷Iná macái imanùbaca pimànicaalícué Santa Cena, iwàwacutácué piwàwalica yái pan íimáanáca càicanide iyúwa Wáiwacali iiná, yá nacái uva ituní copa irícuírica íimáanáca càicanide iyúwa Wáiwacali íiraná. Néese abéericaalí péenácué càmita iyáa yái panca cáimiétaquéri iyú,

ìira nacái yái uva ituníca, yá imànica ibáyawanáwa Wáiwacali irí, càmicáiná iicá cáimiétaquéeri iyú Wáiwacali iiná, íiraná nacái. ²⁸Iná ipíchawáise wayáaca pan, wàira nacái uva ituní copa iricuíse, iwàwacutá wáináidacawa wáalimáwanama wawàwalicuísewa Dios iicápiná asáísí ìyacaalí áiba báawéeri wawàsi wamàníirica iwàwacutéerica wacàlidaca wáichawa quéechacáwa Dios irí ipíchawáise wayáaca, wàiraca nacái yái Santa Cenaca. ²⁹Macái imanùbaca wayáacaalí yái panca, wàiracaalí nacái yái uva ituníca, iwàwacutá wawàwalica íimáanáca càicanide iyúwa Wáiwacali iiná, íiraná nacái, yéetácáinatéwa wáichawalíná cruz ìwali. Càmicaalí càì wáináidacawa, néese wáalimáidaca Dios yùuwichàidáanápíná wíawa. ³⁰Manùbéeyéi péenácué nadéca namànica càì, íná cáuláicaca nía, machawàacaca nacái nía. Abénaméeyéi nadéca néetácawa. ³¹Quéwa wáináidacaalíwa wáalimáwanama wawàwalicuísewa cayába Dios iicápiná asáísí ìyacaalí áiba wawàsi báawéeri wamàníirica iwàwacutéerica wacàlidaca wáichawa Dios irí, néese càmita iwàwacutá Wáiwacali yùuwichàidaca wía. ³²Quéwa Wáiwacali yùuwichàidacaalí wía, yá imànica càì yéewáidacatená wía, wawènúadáanápíná wáiwitáisewa báawéeri íicha, ipíchaná Dios yúucaca wía infierno irìculé náapicha áibanái èeri mìnanaí càmiíyéica yeebáida itàacái.

³³Iná nuénánái, macái imanùbaca pìwacáidáyacacaalícuéwa piyáacatená piyáacaléwa píapichawáaca, iwàwacutácué picùaca macáita pimanùbacaaná yàanàaca. ³⁴Máinícaalí máapica abéeri péenácué, néese iwàwacutá iyáaca iyáacaléwa icapèe néenitawa, ipíchaná Dios yùuwichàidacuéca pía ìwalíise yái càmiínácuéca piyáaca piyáacaléwa machacàníiri iyú macáita pimanùbaca iyúwa, ipíchaná Dios yùuwichàidaca wenàiwica idènièyéica cayába yàacàsi nayáacáiná nayáacaléwa cadénama ipíchawáise catúulécanéeyéi yàanàaca. Néeni, nùanàapínácaalícué nupáchiaca pía, yá nuchùnìaca áiba wawàsi, yái pìsutéericuéca pèemiawa núa ìwali pìasu cuyàluta iricuwa.

Los dones espirituales

12 ¹Píacué nuénánáica, nuwàwacué nucàlidaca pirí áiba wawàsi píalíacatenácuéwa ìwali yái chàinisica Espíritu Santo imàaquéerica walí wáalimáwanama, wáibaidacatená Wáiwacali irípináwa.

²Píalíacuéwa cayába bàaluité càmitacué peebáida Jesucristo itàacái, íná demonionái iméeràidacatécué pía iyúwa máiwitáiséeyéi píacatenáté madécaná ídolo icàaluíniná, níara cuwáiná yéenáiwánaca,

càmíiyéica yáalimá itàaníca. ³Bàaluité càmítacué ídolo iyúudàa pía, íná siúcade nuwàwacué nucàlidaca piríni càinácaalícué píalimá píalíacawa asásí wenàiwica itàanícaalí Espíritu Santo inùmaliçuise: Cawinácaalí itàaníiyéica báawéeri iyú Jesús ìwali, náimacaalí nacái càmítasa Dios yái Jesúsca, yásí píalíacuéwa càmíta natàaní Espíritu Santo ichàini iyú. Néese áibanáicaalí íima: “Yái Wáiwacali Jesús, yácata Wacuèriná Dios”, càicaalí náima, yásí píalíacuéwa náimaca càiri tàacáisi Espíritu Santo ichàini iyú.

⁴Càmíta abédanama Espíritu Santo imàaca wáalimáwanama wachàini wáibaidacaténá Wáiwacali irípináwa. Quéwa abéerita yái Espíritu Santo imàaquéerica walí ichàiniwa, wía yeebáidéeyéica Jesucristo itàacái. ⁵Càmíta abédanama macáita yái wáibaidacaléca Wáiwacali irípiná, néese wadèniaca wáalimáwanama wáibaidacaléwa méetàucunamata wáichawáaca. Quéwa abéerita yái Wáiwacali ichùulièrica wáibaidáanápiná irí. ⁶Wadèniaca chàinisi wáalimáwanama Dios imàaquéerica walí méetàucunamata wáichawáaca, wáibaidacaténá Wáiwacali irípináwa, quéwa abéerita yái Diosca ichàiniadéerica wía canánama, wamànicaténá macáita yái iwàwéerica wamànica. ⁷Dios idéca imàacaca macái wáalimáwanama chàinisi yáasáidéerica wadèniaca Espíritu Santo, wía yeebáidéeyéica Jesucristo itàacái yéewanápiná wayúudàayacacawa. ⁸Espíritu Santo ichàiniadaca abénaméeyéi wéena yeebáidéeyéica Jesucristo itàacái natàanícaténá cáalíacáiri iyú nàalàcaténá áibanái. Néese Espíritu Santo ichàiniadaca áibanái wéena néewáidacaténáwa cachàiníiri iyú nacàlidáanápiná Dios itàacái cayábéeri iyú áibanái irí. ⁹Espíritu Santo ichàiniadaca nacái abénaméeyéi wéena manuícáténá nánáidaca nawàwawa Dios ìwali neebáidacaténá tàì ímèeri iyú. Ichàiniadaca nacái abénaméeyéi nachùniapíná cáuláiquéeyéi. ¹⁰Espíritu Santo ichàiniadaca nacái áibanái wéena namànínápiná wawàsi càmíiri wenàiwica idé imànica. Aibanái wéena nacái Espíritu Santo ichàiniadaca nía nacàlidacaténá tàacáisi Dios inùmaliçuise. Espíritu Santo nacái imàacaca áibanái wéena yáalíacawa càirínácaalí wenàiwica icàlidaca iyaca tàacáisi báisíiri iyú Espíritu Santo inùmaliçuise, yá nacái càirínácaalí icàlidaca iyaca cachíwéeri tàacáisi demonio inùmaliçuise. Aibaalí nacái Espíritu Santo imàaca abénaméeyéi wéena itàaníca áiba tàacáisi iyú càmíirica èeri mìnánái itàacái. Espíritu Santo ichàiniada nacái áibanái wéena yéewanápiná nacàlidaca walíni wataacái iyú càinácaalí íimáaná yái tàacáisica áibanái icàlidéerica càmíirica èeri mìnánái itàacái iyú. ¹¹Abéerita

Espíritu Santo imàaquérica walí chàinisi wáibaidacaténá Wáiwacali irípináwa. Yá Espíritu Santo iwacùaca walí chàinisi wáalimáwanama càide iyúwa iwàwáaná.

Todos pertenecemos a un solo cuerpo

¹²Péemìacué comparación: Wainá idèniaca ìwalíiséeriwa madécaná: níái wacáapica, wacàwa nacái, wàabàli nacái, watuí nacái, wàuwi nacái, madécaná áiba ìwalíiséeri nacái. Quéwa éwita wainá idèniacáaníta ìwalíiséeriwa madécaná, càicáaníta abéericatani, yái waináca. Càica íimaca yái comparaciónca. Uwé, wía yeebáidéeyéica Cristo itàacái, càica wíade iyúwa Cristo iiná iyéerica cháí èeri irícu. Càide iyúwa abéeri wenàiwica iiná idènianá ìwalíiséeriwa madécaná, càita nacái iyaca madécaná wééná, madécaná wenàiwica íiwitáaná nacái. ¹³Càica wíade iyúwa abéeri wenàiwica iiná, yácáiná Espíritu Santo abédanamata imànica wáiwitáise wáapichawáaca, macái wía judíocaalí wía, càita nacái càimíyéica judíocaalí wía, càita nacái áibanái yàasu wenàiwicacaalí wía, càita nacái yèpuníyéicaalíwa máiwacalináwaca wía. Càica wíade iyúwa abéeri wenàiwica iiná. Wabautizáanáwa iyú wáasáidaca abédanamata wáiwitáise wáapichawáaca càide iyúwa abéeri wenàiwica iiná, iyacáiná abéerita Espíritu Santo iwàluèricatéwa wawàwaliculé macáita, wía yeebáidéeyéica Jesucristo itàacái.

¹⁴Péemìacué comparación: Abéeri wenàiwica iiná càmita idèni ìwalíiséeriwa abéerita, néese idèniaca ìwalíiséeriwa madécaná. ¹⁵Cawàwanáta yàabàli íima: “Càmíricata núa icáapi, íná canéerica iwèni núa meedá, càimíricata iiná ìwalíiséeri”, càì íimaca cawàwanáta. Quéwa éwita càì íimaca, càicáaníta mamáalàacata iiná ìwalíiséericani. ¹⁶Càita nacái yùuwicaalí càì íimaca: “Càmíricata núa ituí, íná canéerica iwèni núa meedá, càimíricata iiná ìwalíiséeri”, càì íimaca cawàwanáta. Quéwa éwita càì íimaca, càicáaníta mamáalàacata iiná ìwalíiséericani. ¹⁷Iná ituícaalí macáita yái wainácatá, ¿càinásica wáalimá wéemíaca? Càita nacái yùuwicaalí macáita yái wainácatá, ¿càinásica wáalimá wamíaca pumèníiri isàni? ¹⁸Quéwa Dios idéca imàacaca macái wainá ìwalíiséeyéi alénacaalí iwàwa imàacaca nía. ¹⁹Abéeri ìwalíiséericaalí yái waináca macáitatá, yá canáca wainá macáiritá. ²⁰Báisíta, éwita wainá idèniacáaníta ìwalíiséeriwa madécaná, càicáaníta abéerita yái waináca.

²¹Canáca yéewaná watuí íimaca wacáapi irí càì: “Càmita nuwàwacutá píá”; càita nacái canáca yéewaná wáiwita íimaca wàabàli irí: “Càmita

nuwàwacutá pía”. ²²Néese yái wainá ìwalíiséeri waiquéerica iyúwa machawàaquéeri náicha canánama, yácata máiníiri wawàwacutáca. ²³Yá wainá ìwalíiséeri càmfírica máiní cayábaca iicácanáwa, yáta wamàníirica irí cayábéeri wáiyàanápíná ìwali cayába, cawèníiri nacái. Yá nacái wainá ìwalíiséeri báirica wamàacaca áibanái iicá, yáta iwàwacutéerica wamànica irí cáimiétaquéeri iyú cachàiníwanái, wáiyàanápíná ìwali ibàlepiná càiripínáta. ²⁴Quéwa wainá ìwalíiséeri cayábéerica iicácanáwa, càmita máiní iwàwacutá wàaca ímíétacaná, íná càmita wáiyàa ibàle. Càita Dios idéca ichùnìaca wainá wamànicaténá cáimiétaquéeri iyú cachàiníwanái irí yái wainá ìwalíiséerica waiquéerica iyúwa càmfíri cachàini náicha canánama. Càita ímaca walí yái comparaciónca, wáalícaténáwa càica wíade iyúwa Cristo iiná ìyéerica cháí èeri irícu. ²⁵Dios imàacaca wàyaca càide iyúwa abéeri wenàiwica iiná yéewanápíná abédanamata wáiwitáise wáapichawáaca, yéewanápíná nacái waicáyacacawa catúulécanéeri iyú, yéewacaténá nacái wamànica cayábéeri walíwáaca abédanamata, wía yeebáidéeyéica Jesucristo itàacái. ²⁶Abéericaalí wéená yùuwichàacawa, yá achúmaca wawàwa macáita. Càita nacái namànicaalí cáimiétaquéeri iyú abéeri wéená irí, yásí casíimáica wía macáita.

²⁷Iná macáitacué pía, càicuéca píade iyúwa Cristo iiná ìyéerica cháí èeri irícu, yá píacué canánama píalímáwanama abéeri Cristo iiná ìwalíiséerica pía, yái Cristo iináca ìyéerica cháí èeri irícu. ²⁸Iná Dios iwàwaca wáibaidaca wáapichawáaca Wáiwacali irípináwa, wía yeebáidéeyéica Jesucristo itàacái. Quéechacáwa Wáiwacali ibànùaca abénáméeyéi wéená iyúwa apóstolnái, nèepunícaténáwa áibalé nacàlidacaténá Wáiwacali iináwaná ìwali, yéewanápíná áibanái iwènúadaca íiwitáisewa Jesucristo irípiná; abénáméeyéi wéená yàanàaca apóstolnái yáamirícubàa, níái profetaca icàlidéeyéica tàacáisi Dios inùmaliçuíse. Néese Dios imàacaca áibanái wéená yéewáidaca wenàiwica Dios itàacái iyú, wía yeebáidéeyéica Jesucristo itàacái. Dios imàaca nacái áibanái imànica yái càmfírica wenàiwica idé imànica; imàaca nacái abénáméeyéi ichùnìaca cáuláiquéeyéi wenàiwica; imàaca nacái abénáméeyéi iyúudàaca áibanái; imàaca nacái abénáméeyéi wéená icùaca wenàiwica; imàaca nacái áibanái itàaníca áiba tàacáisi iyú càmfírica èeri mìnánái itàacái. ²⁹Càmíta apóstol macái wía, Wáiwacali ibànuyéyéica wacàlidacaténá iináwaná ìwali. Càmita nacái profeta macái wía, icàlidéeyéica tàacáisi Dios inùmaliçuíse. Càmita nacái macái wéewáida wenàiwica. Càmita nacái

macái wamànica yái càmírica wenàiwica idé imànica. ³⁰Càita nacái càmita macái wadènià Dios ichàini wachùnìanápíná cáuláiquéeyéi. Càmita nacái macái watàaní áiba tàacáisi iyú càmírica èri mìnaná itàacái. Càmita nacái macái wáalía wacàlidaca cànácaalí íimáaná yái tàacáisi càmírica èri mìnaná itàacái. ³¹Pisutácué Dios íicha manuísíwata imàacáanápínácué pirí chàinisi máiníri wamáapùaca náicha canánama, piyúudàacaténácué wía macáita, wía yeebáidéeyéica Jesucristo itàacái. Quéwa iyaca áiba wawàsi máiníri cayábaca cachàiníwanái náicha canánama. Siùcade nuéwáidapínácué pía ìwali.

El amor

13 ¹Iyaca áiba wawàsi cayábéeri náicha canánama chàinisi. Yácata cáinináanáca waicáca áibanái wenàiwica. Nutàanícaalí áiba èri mìnaná itàacái iyú càmíricáwaca nuéwáidawa ìwali, nutàanícaalí nacái ángelnái itàacái iyú, quéwa càmicaalí cáininá nuicáca wenàiwica, yá canéerica iwèni meedá nutàacái càide iyúwa báawéeri sànasi nanúadáidacaalí lata nacáiri, quírápieli nacái. ²Ewita nucàlidacaalí tàacáisi Dios inùmalicuíse, éwita nacái núalíacaalí macái wawàsi ìwali Dios ibèericaté áibanái íicha; éwita nacái nuémíacaalí cànácaalí íimáaná macái íiwitáaná Dios yáalíacáica; éwita nacái manuícaalí nuínáidaca nuwàwawa Dios ìwali tàì íiméeri iyú nuedácaténá manuíri dúli yàalu íichawa áibacatalépiná, càicáaníta canéerica iwèni núa meedá, càmicaalí cáininá nuicáca wenàiwica. ³Ewita nuwacùacaalí macáita nùasuwa catúulécanéeyéi irí, éwita nacái numàacacaalí neemáca núa Dios ìwalíise càmicáiná numéyáawa nuebáidaca itàacái, càicáaníta canéerica iwèni núa meedá, càmicaalí cáininá nuicáca wenàiwica.

⁴Cawinácaalí cáininéerica iicáca wenàiwica, yácata yáaliméerica ìideníaca yùuwichàanáwa matuíbanáiri iyú áibanái imànicaalí irí báawéeri, càmíricata nacái calúa ráunamáita áibanái yáapicha. Iicáca áibanái ipualé iyúudàanápíná nía. Càmíricata nacái báawa iicáca íichawa áibanái nàasu cawèníri ìwalíise. Càmíricata nacái canùmasée, càmicáiná cachàini iicáca yáawawa. ⁵Cawinácaalí cáininéerica iicáca wenàiwica, càmíricata cáimacái iicáca yáawawa, càmírica nacái imàni áibanái irí báawéeri; càmírica nacái ichùulia áibanái cachàiníri iyú namànínápíná abéerita càide iyúwa iwàwáaná namànica. Ewita áibanái yáalimáidacáaníta iicáwani, càicáaníta càmita calúani, càmita nacái iwàwali mamáalàacata yái báawéerica áibanái imànírica irí, néese imàacaca iwàwawa íicha. ⁶Càmita casímái iicáca

wenàiwica namànica nabáyawanáwa nàuwichàidacaténá áibanái, néese casfímáica iwàwa iicáca wenàiwicanái iyaca machacànñiri iyú. ⁷Cawinácaalí cáininéerica iicáca áibanái wenàiwica, càmfíricata icháawàa naináwaná ìwali ráunamáita namànicaalí báawéeri, néese imàacaca iwàwawa nabáyawaná fícha; iicá nacái macáita wenàiwica iyúwa cayábéeyéipiná íiwitáise; ituíyàa nacái nawènúadánápiná náiwitáisewa namànicaténá cayábéeri; yá ìideniaca macáita càiripináta matuíbanáiri iyú, éwita càulenácáaníta fíchani.

⁸Dios iwàwaca cáinináca waicáca áibanái càiripináta cháí èeri írìcu, áibaalípiná nacái idécanáami èeri imáalàacawa. Yá áibaalípiná càmfíripináta iwàwacutá wenàiwica nacàlidaca tàacáisi Dios inùmaliçuise. Càmfíripináta nacái natàaníca áiba tàacáisi iyú càmfírìca èeri mìnaná itàacái. Càmfíripináta nacái iwàwacutá néewáidaca wenàiwica Dios yáalíacái ìwali. ⁹Aibaalípiná Dios imàacapiná nachàbacawa wáicha macáita yái wawàsica, yácáiná éwita Dios imàacacáaníta wáalíacawa siùcade, càicáaníta wáalía yéénáta meedá. Dios imàacaca abénaméeyéi wééná nacàlidaca tàacáisi inùmaliçuise, quéwa náalimá nacàlidaca yéénáta meedá nacái. ¹⁰Quéwa Cristo yàanàapínacaalí cachàinñiri íiwitáise yáapichawa, icamalá írìcu nacáiwa icùacaténá macáita, yásí wáalíacawa macáita, yá nacái imáalàapínacawa yái càmfínáca wáalíawa cayába siùcade.

¹¹Péemíacué comparación: Sùmàicaalíté núa, yáté nutàaníca sùmài íiwitáise iyú, càité nacái nuínáidacawa iyúwa sùmài, quéwa idécanáamité béerica núa, yáté numàacaca nuíchawéi sùmàináca nuíwítáise. ¹²Càita nacái wía, wía yeebáidéeyéica Jesucristo itàacái cháí èeri írìcu. Siùcade càmita wáalíawa Dios ìwali cayába, quéwa áiba èeriwa, yásí wáalíacawa cayába. Siùcade wáalía wéemíaca yéénáta meedá càinácaalí íimáaná yái Dios yáalíacáica, càide iyúwa waicácaalí wíawawa samànéechúa inàni chapúaca írìculé, quéwa áiba èeriwa waicápiná Dios inàni amaláwaca. Siùcade wáalíacawa yéénáta meedá Dios ìwali, quéwa áiba èeriwa wapíchalépinácáwa, yásí wáalíacawa amaláwaca Dios íiwitáise ìwali càide iyúwa Dios yáalíanáwa wáiwitáise ìwali.

¹³Càide iyúwa núumáaná, macáita yái chàinisi Dios imàaquéerica walí wáibaidacaténá írìpiná, áiba èeriwa Dios imàacapiná nachàbacawa wáicha. Quéwa càmfíyéipináta nachàbawa wáicha níái máisiba wawàsica: yái weebáidáanáca Jesucristo, yá nacái wáalíanácawa idéca iwasàaca wía Dios yàasu yùuwichàacáisi fícha, yá nacái cáinináanáca waicáca

áibanái. Níái máisiba wawàsica canácatáita nachàbawa wáicha, quéwa cachàinica náicha canánama yái cáinináanáca waicáca áibanái.

El hablar en lenguas

14 ¹Píalimáidacué manuísíwata cáinináanápiná piicáca áibanái. Néese pituíyàacué nacái Dios imàacáanápinácué pírí chàinisi píibaidacatená Wáiwacali írípíná. Cayába cachàiníwanái pituíyàacaalícué Dios imàacáanápiná pírí chàinisi picàlidáanápinácué tàacáisi Dios inùmaliçuise pimanùbacaaná itàacái iyúwa, piyúudàacatenácué nía. ²Cài núumacuéca pírí yácáiná áibacaalí itàaní áiba tàacáisi iyú càmiíríca èeri mìnaná itàacái, càmita iyúudàa nía yàasu tàacáisi iyúwa, néese itàanícáita Dios yáapícha, canácáiná áibanái yáalíaná yéemíacani càinácaalí ímáaná, éwita néemíacáaníta isàna. Espíritu Santo ichàiniadacani icàlidacatená càiri tàacáisi ibàacanèeri wawàsi ìwali càmiíríca èeri mìnaná itàacái iyú, quéwa itàníca tàacáisi càmiíríca yáalí càinácaalí ímáaná. Iná yái tàacáisi càmita iyúudàa áibanái. ³Quéwa cawinácaalí icàlidéeríca tàacáisi Dios inùmaliçuise pitàacái iyúcué, yáta iyúudàacué pía yéewáidacáinácué pía pidàwinàidacatená píiwitáisewa Dios íiwitáise iyú cachàinínápinácué píiwitáise Dios ìwali. Yái icàlidéerícuéca pírí tàacáisi Dios inùmaliçuise pitàacái iyú, yáta imichàidacuéca píiwitáise, ichàiniadacué nacái piwàwa peebáidacatenácué Dios tàì íméeri iyú. ⁴Cawinácaalí itànííríca Dios yáapícha áiba tàacáisi iyú càmiíríca èeri mìnaná itàacái, yáta ichàiniadéeríca íiwitáisewa Dios ìwali. Quéwa cawinácaalí icàlidéerícuéca pírí tàacáisi Dios inùmaliçuise pitàacái iyú, yáta iyúudàacué pía pidàwinàidacatená píiwitáisewa Dios íiwitáise iyú cachàinícaténácué píiwitáise Dios ìwali, píacué yeebáidéeyéica Jesucristo itàacái.

⁵Macáita péenácué idèniacaalí chàinisi itàanícaténá áiba tàacáisi iyú càmiíríca èeri mìnaná itàacái, yá cayábaca casímáicáiná nuicáca yái pímaníínácuéca càì. Quéwa cayába cachàiníwanái nuwàwa picàlidacaalícué tàacáisi Dios inùmaliçuise péenánái itàacái iyúwa. Cayába cachàiníwanái yái picàlidáanácuéca tàacáisi Dios inùmaliçuise péenánái itàacái iyúwa, ícha yái pitàanínácuéca áiba tàacáisi iyú, càmicaalícawa nacái picàlidacué nalí càinácaalí ímáaná yái tàacáisi picàlidéerícuéca. Iwàwacutácué picàlidaca nalíni nataacái iyú, piyúudàacatenácué nadàwinàidaca náiwitáisewa Dios íiwitáise iyú, cachàinícaténá náiwitáise Dios ìwali. ⁶Iná nuénánái nupáchiacaalícué pía, yá nutàanícaalícué pírí áiba tàacáisi iyú càmiíríca èeri mìnaná

itàacái, yá càmítacué píalía péemiaca càinácaalí ímáaná nùasu tàacáisi. Numànicaalí càì, néese nùasu tàacáisi càmíta iyúudàacué pía. Iná canéerica iwèni meedá pirícuéni, yái nùasu tàacáisica. Quéwa nucàlidacaalícué piríni machacàníiri iyú pitàacái iyú, yái tàacáisi Dios imàaquéerica nùalíaca ìwali, nucàlidacaalícué nacái pirí pitàacái iyúni càinácaalí ímáaná yái báisiiri tàacáisica, nucàlidacaalícué nacái pirí tàacáisi Dios inùmaliçuíse pitàacái iyú, nuéwáidacaalícué pía nacái Dios ìwali, yásí nùasu tàacáisi iyúudàacuéca pía, yéewanápinácué peebáidaca Dios itàacái tàì íiméeri iyú.

⁷Péemiacué comparación: Napùliacaalí flauta íwa nacáiri namànicaténá música, nanúacaalí arpa nacái, càmicaalí namàni música machacàníiri iyú, néese áibanái càmíta náalía néemiaca cawinácaalí música íiwitáanáqueí càì namànica. ⁸Néeni, nucàlidacué pirí áiba comparación ùwicái ìwali: Aibacaalí ipùlia trompeta imáidacaténá úwinái, càmicaalí ipùlia amaláwaca, néese càmíta náalíawa iwàwacutáaná nachùniaca nacáapisàíwa namànicaténá ùwicái. ⁹Càitacué nacái pía: Càmicaalícué pitàaní pitàacái iyúwa péewáidacaténá wenàiwica amaléeri tàacáisi iyú náaliérica néemiaca càinácaalí ímáaná, néese càmítacué náalía néemiaca píasu tàacáisi. ¡Yái tàacáisi picàlidéericuéca nalí càmíta iyúudàapíná nía! ¹⁰Báisiiri iyúcata iyaca madécaná íiwitáaná èeri mìnanaí itàacái cháì èeri írìcu. Nía nacái itàaníiyéica càì náalíaca néemiacani, natàacáicáináni. ¹¹Quéwa càmicaalí nùalía nuémiaca càinácaalí tàacáisi ímáaná áiba wenàiwica icàlidéerica nulí, yásí nuínáidacawa ìwali áiba cáli néeséericani nùasu cáli íicha. Càita nacái íináidacawa nùwali càmíicáiná nùalía nuémiaca càinácaalí itàacái ímáaná. ¹²Càita nacái pitàanícaalícué áiba tàacáisi iyú, càmíirica èeri mìnanaí itàacái, yásí áibanái càmíta náalimá néemiaca càinácaalí píasu tàacáisi ímáaná, yá càmítacué piyúudàa nía. Iná piwàwacáinácué Dios imàacaca pirí chàinisi píibaidacaténácué írípíná cachàiníiri iyú, yá pituíyàacué Dios imàacáanápinácué pirí chàinisi yéewacaténácué piyúudàaca wenàiwica manuísíwata yeebáidéeyéica Jesucristo itàacái nadàwinàidacaténá náiwitáisewa Dios ìwali, neebáidacaténá itàacái tàì íiméeri iyú.

¹³Iná cawinácaalí wenàiwica Dios imàaquéerica írì chàinisi itàanicaténá áiba tàacáisi iyú càmíirica èeri mìnanaí itàacái, iwàwacutá isutáca Dios íicha imàacáanápiná írì chàinisi icàlidacaténáni áibanái írì nataacái iyúwa càinácaalí ímáaná yái tàacáisica. ¹⁴Càita nacái núa: Espíritu Santo imàacacaalí nusutáca Dios íicha áiba tàacáisi iyú càmíirica

èeri mìnánáì itàacáì, yá nusutáca Dios ícha manuísíwata, quéwa càmita núalfawa càinácaalí nùasu tàacáisi ímáaná. Nutàanícaalí càì, yá càmita nudé nuyúudàaca wenàiwica nùasu tàacáisi iyúwa. ¹⁵Iná nucàlida pírì càinácaalí numàinínápináca: Nusutápiná Dios ícha áiba tàacáisi iyú càmírìca èeri mìnánáì itàacáì, nucántàa nacáì Dios írì tàacáisi iyú càmírìca èeri mìnánáì itàacáì. Quéwa nusutápiná Dios ícha nacáì wenàiwica itàacáì iyú, nucántàa nacáì Dios írì wenàiwica itàacáì iyú. ¹⁶Càita numànica yácáiná, wàacaalí cayábéeri Dios írì manuísíwata áiba tàacáisi iyú càmírìca èeri mìnánáì itàacáì, néese níái áibanáì yéemièyéica wasàna càmicaalí náalíawa néemiàcani yái tàacáisica, yá càmita yáalimá abédanama náiwitáise wáapicha iyúwa wàaná Dios írì cayábéeri, càmicáiná náalía néemiàcani, càinácaalí ímáaná yái wasutéerica. ¹⁷Cawàwanáta wàaca cayábéeri Dios írì cayábéeri iyú, quéwa áibanáì wenàiwica íiwitáise càmita idé idàwinàacawa Dios íiwitáise iyú, neebáidacaténá itàacáì tàì íiméeri iyú, càmicáiná náalía néemiàca càinácaalí wàasu tàacáisi ímáaná. ¹⁸Nùaca Dios írì cayábéeri nutàanícáiná Dios yáapicha cachàiníwanáì píichacué canánama áiba tàacáisi iyú càmírìca èeri mìnánáì itàacáì, idècunitàacá nùyaca nulínáamitawa méetàucuta áibanáì ícha nusutácaténá núawawa Dios ícha. ¹⁹Quéwa culto írìcu, nùyacaalí áibanáì yèewi yeebáidéeyéica Jesucristo itàacáì, yásì cayába cachàiníwanáì núumacaalí cinco namanùbaca palabra natàacáì iyú náalíerica néemiàca càinácaalí ímáaná nuéwáidacaténá níá ícha yái núumáanáca diez mil namanùbaca palabra áiba tàacáisi iyú càmírìca náalía néemiàca càinácaalí ímáaná.

²⁰Píacué nuénánáica, picácué pínáidawa càide iyúwa sùmàì fináidáanáwa càmíiyéì yáalfawa cayába. Pìyacué càide iyúwa sùmanáì càmíiyéica yáalfawa madécaná báawéeri ìwali. Quéwa pínáidacuéwa cáalfacáiri iyú càide iyúwa béeyéì, píalíacaténácué péemiàca yái núuméericuécá pírì ìwali yái tàacáisi càmírìca èeri mìnánáì itàacáica. ²¹Bàaluité profeta itànàaca tàacáisi Dios inùmalicuise. Dios ímacaté: “Nutàanípiná israelitanáì yáapicha quéwa áiba cáli néeséeyéì itàacáì iyú. Nubànùapíná càmíiyéì israelitanáì nacàlidacaténá tàacáisi nunùmalicuise israelitanáì írì, quéwa éwita numànicáanáta càì, càicáanáta níái israelitaca càmita neebáidapíná nutàacáíwa”, ímaca Wacuèriná Dios. ²²Iná watàanícaalí áiba tàacáisi iyú, càmírìca èeri mìnánáì itàacáì, yá càmita wáasáida Dios ichàini wenàiwicanáì írì yeebáidéeyéica Jesucristo itàacáì, néese wáasáidaca Dios ichàini áibanáì

irí càmíiyéica yeebáida Jesucristo iwali. Quéwa wacàlidacaalí tàacáisi Dios inùmalicuíse wataacái iyúwa, yá càmíta wáasáida Dios ichàini áibanái irí càmíiyéica yeebáida Jesucristo itàacái, néese wáasáidaca Dios ichàini wenàiwicanái irí yeebáidéeyéica Jesucristo itàacái. ²³Néese culto irícu, píacué yeebáidéeyéica Jesucristo itàacái, macáicaalícué pitàaníca áiba tàacáisi iyú càmíirica èeri mìnanaí itàacái iyú, yá cawàwanáta áiba wenàiwica iwàlùacawa càmíirica yáalíawa iwali yái pimàníinacuéca, áiba nacái càmíiri yeebáida Jesucristo itàacái. Yásí néemiacuéca pisàna, yá nàináidacawa máiwitáiseeyéicuéca pía macáita. ²⁴Quéwa macáicaalícué picàlida tàacáisi Dios imàaquéerica pirí pitàacái iyúwa, yá nacái áibacaalí wenàiwica iwàlùawa càmíirica yáalíawa iwali yái pimàníinacuéca, áiba nacái càmíirica yeebáida Jesucristo itàacái, yásí nawàwalica nadéca namànica nabáyawanáwa, náalíacáiná néemiaca macáita yái picàlidéericuéca, natàacái iyúcáináni. ²⁵Iná néemiacáináni, yá náalíacawa Dios iicáca náiwitáise, iyúwa nàináidáanáwa nawàwalicuísewa ibàacanéri iyú áibanái ícha. Yásí nabàlùacawa nàulùì ipùata iyúwa nàacaténá Dios icàaluíniná, nàacaténá nacái irí cayábéeri. Yá nacàlidapínacué piináwaná iwali nacái Dios iyáanacué píapicha báisíiri iyú.

Háganlo todo decentemente y con orden

²⁶Uwé, píacué nuénánáica, macái imanùbaca pimànicaalícué culto, abénaméeyéi péenacué icántàapíná salmos nàacaténá Dios irí cayábéeri, abénaméeyéi péenacué nacái yéewáida wenàiwica Dios itàacái iyú, áibanái péenacué nacái icàlidaca tàacáisi Dios imàaquéerica náalíacawa, áibanái péenacué itàaníca áiba tàacáisi iyú, càmíirica èeri mìnanaí itàacái, áibanái péenacué nacái icàlidaca càinácaalí íimáaná yái tàacáisica. Quéwa, piicácué píichawa cayába yéewanápiná macáita yái pimàníiricuéca culto irícu iyúudàaca wenàiwica nadàwinàidacaténá náiwitáisewa Dios íiwitáise iyú neebáidáanápiná Dios tàì íiméeri iyú, níái yeebáidéeyéica Jesucristo itàacái. ²⁷Natàanícaalí culto irícu áiba tàacáisi iyú càmíirica èeri mìnanaí itàacái, pimàacacué pucháiba itàaníca, áibacaalí iya, néese pimàacacué máisiba wenàiwica itàaníca abéerinamata. Iwàwacutá nacái áiba iyaca néré píapichacué icàlidacaténacué pirí càinácaalí íimáaná, yái tàacáisi nacàlidéerica. ²⁸Quéwa canácaalí áiba icàlidéeripínacué pitàacái iyúni, càinácaalí íimáaná yái tàacáisi áibanái iwàwéerica icàlidaca, iwàwacutá masànaca nía culto irícu, ipíchaná natàaníca áiba tàacáisi iyú. Iwàwacutá natàaníca

Dios yáapicha nàyacaalí nalínáamitawa méetàucuta áibanái íicha. ²⁹Càita nacái nàyacaalí abénaméeyéi péenacué icàlidéeyéica tàacáisi Dios inùmaliçuise, pimàacacué pucháibata itàaníca, áibacaalí ìya, néese pimàacacué máisiba wenàiwica itàaníca abéerinamata. Iwàwacutá áibanái yéemìacani yái nacàlidéerica, náináidacatenáwa cáalíacáiri iyú ìwali, yéewanápiná náalíacawa asásí báisícaalí natàaníca Dios inùmaliçuise. ³⁰Quéwa Dios imàacacaalí tàacáisi áiba wenàiwica irí yáawinéericawa néré, yásí yái idàbáanéeri wenàiwicaca iwàwacutá yáawinacawa imàacacatená áiba icàlidaca nacái nalíni. ³¹Càita píacué macáita icàlidéeyéica tàacáisi Dios inùmaliçuise, píalimácué picàlidacani abéerinamata yéewanápiná macáita néemìaca cànícaalí tàacáisi Dios imàaquéerica píalíacawa, nachàiniadacatená nawàwawa. ³²Cawinácaalí icàlidaca tàacáisi Dios inùmaliçuise náalimá masànaca namànica níawawa ìyacaalí áiba iwàwéerica icàlidaca tàacáisi Dios imàaquéerica irí. ³³Càita iwàwacutácué pimànica culto càmíicáiná Dios ibatàa macáita nacàlidaca tàacáisi macáita namanùbaca iyúwa, néese imàaca natàaníca abéerinamata. Càmita iwàwa wamànica culto canéerica iwèni iyúwa máiwitáiséeyéi. Iwàwacutácué pimànica nacái càide iyúwa macáita Dios yàasu wenàiwica imàníiná, níara áibanái yeebáidéeyéica Jesucristo itàacái, ìwacáidáyaquéeyéicawa yàcalé imanùbaca. ³⁴Iná iwàwacutá masànaca inanái culto irícu. Canáca yéewaná inanái itàaníca culto irícu. Néese iwàwacutá nàaca nàacawéeri fímiétacanáwa, neebáida nacái itàacái, càide iyúwa Dios itàacái fímáaná profeta Moisés itànèricaté. ³⁵Néeni, inanái nawàwacaalí náalíacawa wawàsi ìwali, iwàwacutá nasutáca néemìawa nàacawéeriwa nacapèe néenitawa, báawacáiná inanái itàaníca culto irícu.

³⁶Piwàwalicué Dios itàacái càmíirica píapicha idàbatéwa. Càmitacué nacái pía abéta yeebáidani. Iná iwàwacutácué peebáidaca càide iyúwa Dios itàacái fímáaná. ³⁷Báisícaalícué píalimá picàlidaca Dios itàacái wenàiwicanái irí, càita nacái báisícaalícué Espíritu Santo imàacacaté pírí chàinisi cáalíacáicaténacué pía, yásí píalíacuéwa Wáiwacali ichùulíacaté nutànàanápinácué pírí yái tàacáisica. Iná iwàwacutácué peebáidacani. ³⁸Quéwa nàyacaalí abénaméeyéi càmíiyéica iicá nùasu tàacáisi iyúwa Wáiwacali itàacái, picácué péemìa nalí, càmíicáiná natàaní báisíiri iyú Dios inùmaliçuise.

³⁹Iná nuénánái, pituíyàacué Dios imàacáanápinácué pírí chàinisi picàlidacatená tàacáisi inùmaliçuise. Picácué pimáisanìa áibanái itàaníca áiba tàacáisi iyú càmíirica èeri mìnánái itàacái. ⁴⁰Quéwa

iwàwacutácué pimànica macáita machacàníiri iyú culto irìcu, pimàacacué wenàiwica icàlidaca tàacáisi abéerinamata, áiba itàaní áiba yáamíise.

La resurrección de Cristo

15 ¹Siùcade píacué nuénánáica, nuwàwacué nucàlidacuéca pirí àniwa piwàwalicaténáni yái tàacáisica nucàlidéericatécué pirí, yái tàacáisi ímérica Cristo iwasàacuéca pí Dios yàasu yùuwichàacáisi íicha. Yácata tàacáisi peebáidéericatécué, siùca nacáide peebáidacuéca pìyacani tàì íméri iyú. ²Yásí Cristo iwasàacué píawa Dios yàasu yùuwichàacáisi íicha peebáidacaalícué mamáalàacata yái tàacáisi nucàlidéericatécué pirí, báisicaalícué peebáidacaté Cristo itàacái.

³Quéchaté nucàlidacuéca pirí yái tàacáisi cachàiníiri náicha canánama càide iyúwaté Cristo yéewáidáaná núa. Nucàlidacatécué pirí Cristo yéetacatéwa wáichawalíná ipíchaná Dios yùuwichàidaca wía wabáyawaná ìwalísewa càide iyúwa Dios itàacái ímáaná profetanái itànèricaté. ⁴Nucàlidacatécué pirí nacái nabàlìacaté Cristo càliculìi irìculé, quéwa imichàacatéwa yéetacáisi íicha máisiba èeri irìcu càide iyúwaté ímáaná nacái Dios itàacái profetanái itànèricaté. ⁵Nucàlidacatécué pirí nacái Cristo imàacacaté yáawawa Pedro iicácani, néese imàacacaté yáawawa naicácani, níái doce namanùbaca apóstolca, Cristo ibànuyéicaté nacàlidacaténá itàacái. ⁶Néeseté Cristo imàacaca yáawawa naicácani, áibanái quinientos ichàbaníiseyéica yeebáidéeyéica itàacái. Yá batéwa macáita néená iyaca siùcade nutànàacaalícáwa yái cuyàlutaca, quéwa abénaméeyéi néená nadéca néetácawa. ⁷Néeseté Cristo imàacaca yáawawa iméeréeri iicácani, yái Santiagoca, néeseté macáita apóstolnáì naicácaté Cristo nacái.

⁸Néeseté idécanáami imàacaca yáawawa macái áibanái iicácani, yáté átata imàacaca nacái yáawawa nuicácani. Iná nuicáca núawawa càiride iyúwa sùmàì càmfíricáwa imusúawa yàasu èeri irìcuwa, máinicáináté námíiseca Wáiwacali imáidaca núa ibànucacaténá núa iyúwa apóstol. ⁹Núacata càmfíiri cachàini náicha canánama níái apóstolca, Wáiwacali ibànuyéica nacàlidacaténá iináwaná. Canácaté yéewaná núumaca nùwaliwa apóstolca núa nupìadáidacáináté Dios yàasu wenàiwica, nùuwichàidacaténáté nía, níái yeebáidéeyéicaté Jesucristo itàacái. ¹⁰Quéwa Dios idéca imànica nulí cayábéeri mawèníiri iyú imáidáanápínáté núa yéewanápínáté apóstolca núa, éwita nùuwichàidacáanítaté yàasu wenàiwica manuísíwata. Yá càmita caná iwèni yái imáidáanáca núa, nuíbaidacáiná irípiná cachàiníwanái

macái áibanái apóstol ícha. Quéwa càmita càì numànica nuchàini iyúwa, néese Dios yái imànírica nulí cayábéeri mawènfiri iyú, yácata iyúudèerica núa. ¹¹Quéwa éwita wáibaidacáaníta Dios iripiná, níái áibanái apóstol, núa nacái, càicáaníta ìyaca áiba wawàsi cachàinfiri wáicha canánama, yácata yái tàacáisi wacàlidéericuéca pirí, yái tàacáisi peebáidéericatécué nacái.

La resurrección de los muertos

¹²Wadéca wacàlidacuéca pirí Cristo imichàacatéwa yéetácáisi ícha, quéwa abénaméeyéi péenacué náimaca càmitasa wenàiwicanái imichàawa yéetácáisi ícha. Báawéeriquéi nacàlidáanáca càiri cachìwéeri tàacáisi. ¹³Càmicaalípiná yéetéeyéimiwa idé imichàacawa yéetácáisi íchatá, néese iwàwacutá nacái wáimaca càmitaté báisí Cristo imichàacawatá. ¹⁴Néese, càmicaalíté báisí Cristo imichàawatá, yá canéerica iwènitáni yái tàacáisica wacàlidéerica. Yá nacái canéerica iwèni meedáni yái peebáidáanáca Jesucristo itàacáitá. ¹⁵Quéwa ìyaca áiba wawàsi báawéeri yáwanái: Càmicaalípiná yéetéeyéimiwa idé imichàacawa yéetácáisi íchatá, néese àta wía apóstolca wadéca wacàlidaca wachìwawa Dios ìwalítá, wacàlidacáiná Dios imichàidacaté Cristo yéetácáisi ícha. Quéwa càmicaalípiná Dios imichàida yéetéeyéimiwatá, néese iwàwacutá wacàlidaca càmitaté Dios imichàida Cristotá. ¹⁶Yácáiná càmicaalípiná yéetéeyéimiwa idé imichàacawatá, néese càmitaté báisí nacái Cristo imichàawatá. ¹⁷Càmicaalí Cristo imichàacatéwa yéetácáisi íchatá, néese iwàwacutá canéerica iwèni meedátáni yái peebáidáanácuéca Cristo itàacái, yá pìyacuéca mamáalàacata pibáyawaná yáapichawatá. ¹⁸Càmicaalípiná yéetéeyéimiwa idé imichàacawa yéetácáisi íchatá, néese áibanái yeebáidéeyéimicaté Cristo itàacái ipíchawáiseté néetácawa nadéca náucacawa Dios íchatá. ¹⁹Wadéca wawènúadaca wáiwitáisewa ícha macáita yái èeri irìcuíríca, weebáidáanápiná Cristo itàacái wacùanápiná cayábéeri èerica yànèeripináca, wáalíacáináwa wamichàanápináwa yéetácáisi ícha. Iná càmicaalípiná yéetéeyéimiwa idé imichàacawa yéetácáisi íchatá, yá wadéca weebáidaca cachìwéeri tàacáisitá, iwàwacutá nacái áibanái iicáca wía càiyéide iyúwa yùuwichèeyéiwa catúulécanéeri iyú cachàini áibanái ícha canánama.

²⁰¡Quéwa Cristo idéca imichàacawa yéetácáisi ícha báisíiri iyú! Yácata yái idàbáanéericaté imichàacawa yéetácáisi ícha càmfíripiná quirínama yéetácawa àniwa. Càita nacái yácata Cristo idàbáanéerica

wamanùbaca ná yéena, wía manùbéeyéica imichèeyéipinácawa yéetácáisi ícha càide iyúwa bànacalé imusúacaalfwa cáli iricúise wenàiwica yeedátaténá iyacaná manùba. ²¹Bàaluité wàawirimi Adán, yái idàbàanéericaté wenàiwica, imànicaté ibáyawanáwa, ínáté yéetácáisi iwàlùacatéwa iriculé èriquéi. Néese Cristo imànicaté cayábéeri càide iyúwa Dios iwàwáaná, íná yéewa idéca iwàlùacawa aléi èri iriculé yái wamichàanápínacawa yéetácáisi ícha. ²²Macáita wía Adán itaquénáinami wéetápinácawa wadèniacáiná wàawirimi Adán íiwitáise cabáyawanéeriwa. Càide iyúwa macáita wía wadèniáná abéeri wàawirimi, yái Adánca, càita nacái wía iyéeyéica abédanamata Cristo yáapicha wamichàapínacawa yéetácáisi ícha wadèniacáiná wacáuca wàlisaiwa càmfíri imáalàawa. ²³Quéwa Dios idéca íináidacawa imàacáanápíná wamichàacawa yéetácáisi ícha Cristo yáamíise: Quéchatécáwa Cristo imichàacatéwa càide iyúwa idàbàanéeri needáca iyacanáica nabànacale íchawa. Néese Cristo yàanàapíná àniwa, yásí macáita wamichàapínacawa, wía yàasu wenàiwicaca. ²⁴Néese èri imáalàacaalípináwa, yásí Cristo imáalàida nachàini, macái èri mìnáná icuèrinánáica, demonio íiwacanánái nacái. Néese idécanáami Cristo imànica macáita càide iyúwa Dios ichùulianáni, yásí Cristo yèepùadapíná macáita Yáaniri Dios iríwa àniwa, Dios icùacaténá macáita. ²⁵Iwàwacutácáiná Cristo icùaca macáita siúcáise idècunitàacá Dios imawèniadaca macáita Cristo yùuwidenái. ²⁶Yái wàuwide namáalàidáanáca canánama, yácata yái yéetácáisica; yá Dios imawèniadéeripíná, imáalàidapíná nacái yéetácáisi, iwasàapínacaalí wía yéetácáisi ícha. ²⁷Dios idéca imàacaca Cristo icùaca macáita, íná yéewa wáalíaca iyaca abéerita càmfírira Cristo ichùulia, yái Yáaniricawa yái Diosca. ²⁸Aibaalípiná idécanáami Dios imawèniadaca macáita Cristo yùuwidenái, néese Cristo, yái Dios íirica, imàacapíná yáawawa Dios irí, imànicaténá càiripínáta càide iyúwa Dios ichùulianá, yái imàaquéericaté Cristo icùaca macáita. Yásí Dios icùaca macáita càiripínáta, macáita yái iyéerica.

²⁹Néese abénaméeyéi péenacué nadéca neebáidaca Jesucristo itàacái, nawàwacáiná nadèniaca nacáuca wacámfíri imáalàawa áiba èriwa néenánáimi yáapichawa, níara yéetéeyéimicawa yeebáidéeyéicaté Jesucristo itàacái. Yá nadéca nabautizácawa náasáidacaténá nàyanápiná àniwa néenánáimi yáapichawa áiba èriwa. Quéwa càmicaalípiná yéetéeyéimiwa idé imichàacawa yéetácáisi íchatá,

néese canéerica iwèni meedátáni, yái wenàiwicanáí ibautizáanácawa nàwaliná. ³⁰Néeni càmicaalípiná yéetéeeyéimiwa idé imichàacawa yéetácáisi íichatá, néese canéerica iwènitáni wèepunícaalíwa wacàlidacaténá Jesucristo iináwaná ìwali áibalé nawàwacataléca nanúaca wía macáí èeri imanùbaca. ³¹Báisíta nuénánái, áibanáí iwàwaca inúaca núa macáí èeri imanùbaca; càita nacáí báisíta máiní casímáica nuicácuéca pía peebáidacáinácué Wáiwacali Jesucristo itàacái. ³²Chá nacáí Efeso ìyacàlená írìcu nawàwacaté nanúaca núa, níái áibanáí càmfíyéica yeebáida, caluényéi cuwèesi nacáiyéi íiwitáise, iwàwéeyéicaté imàdáidaca nuèwi. Quéwa càmicaalípiná yéetéeeyéimiwa idé imichàacawa yéetácáisi íichatá, yá canéerica iwèni meedátáni yái nùuwichàanácawa Wáiwacali írípíná. Píicácué píichawa cawinácaalí càmfíyéica yeebáida yéetéeeyéimiwa imichàanápínáwa, náimacáiná càiri cachìwéeri tàacáisi: “Wàacué wayáaca wayáacaléwa cadénama, wàira nacáí manuí, táwìchacáiná wéetápinácawa, néese canáca wía, canáca nacáí yùuwichàidéeripíná wíawa wabáyawaná ìwalíise”, náimaca.

³³Picácué pimàaca nachìwáidaca pía, néese piacuéwa náicha, càide iyúwa áiba tàacáisi íimáaná cáalífacáiri iyú: “Wamàacacaalí báawéeyéi íiwitáise yàacawéeridaca wía, yásí namáalàidaca wáicha wáiwitáise cayábéeri”, íimaca. ³⁴Piwènúadacué píiwitáisewa báawéeri íicha píináidacaténácuéwa cáiwitáiséeri iyú càide iyúwacué iwàwacutáaná pìyaca machacàníiri iyú; yá picácué pimàni quirínama píbáyawanáwa. Càì nùumacué pírí báicaténácué pía, núalífacáináwa abénaméeyéicué pèewi càmitàacáwa náalía Dios ìwali báisíiri iyú.

Cómo resucitarán los muertos

³⁵Abénaméeyéi péenácué càmita neebáida yéetéeeyéimiwa imichàanápínáwa yéetácáisi íicha, íná namànica naquíniwa ìwali, yá náimaca: “Càmìta náalimá nacáucàacawa, níái yéetéeeyéimicawa. ¿Càiríinásica chéecáisi íiwitáaná iyú namusúapínáwa càliculii írìcuíse?” càì náimaca naicáaníca. ³⁶¡Natàanicáita máiwitáiséeri iyú meedá! Péemíacué comparación: Wabànacaalí bànacalé íimi cáli írìculé, néese bànacalé íimi iwàwacutá iyaca càiride iyúwa yéetéerimiwa yéewanápíná iyaca yái bànacaléca. ³⁷Yái íimi wabànéerica, càmfírita íimi yái imusuéricawa cáli írìcuíse. Wabànacáita bànacalé íimi, cawàwanáta trigo ituíná íimi, càmicaalí áiba bànacalé íimi nacáí. ³⁸Yái ibaquéericawa Dios yàa iicacánáwa càide iyúwa Dios iwàwáaná.

Macái bànacalé fími íiwítáaná, Dios idéca imàacaca idèniaca bànacalé iicácanáwa càide iyúwa Dios iwàwáaná. ³⁹Càita nacái iinási càmíta abédanamani. Wía èeri minanáica wadèniaca waináwa áiba íiwítáanáta. Cuwèsináí nadèniaca nacái naináwa áibata. Cuipìra iiná, áiba íiwítáanáta nacái. Cubái iiná, áiba íiwítáanáta nacái. ⁴⁰Càita nacái níara iyéeyéica chènuniré nadèniaca naináwa áibata íicha yái naináca macáita níái iyéeyéica cháí èeri irícu. Quéwa chènuníiséeyéí áibata nadèniaca cayábéeri naicácanáwa èeri irícuíyéí íicha, yácáiná chènuníiséeyéí iináca icànaca mèlumèluíri iyú. ⁴¹Càita nacái níái iyéeyéica capìraléeri cáli íinata. Nadèniaca nacamaláwa áibata. Néese èeri udèniaca ucamaláwa áibata. Néese quéeri udèniaca ucamaláwa áibata. Néese dùlupùta nadèniaca nacamaláwa áibata. Nía nacái dùlupùtaca nadèniaca nacamaláwa méetàucunamata náichawáaca. Càita íimaca comparaciónca.

⁴²Càipiná nacái namichàacawa níái yéetéeyéimicawa. Idécanáami nabàliaca wainámi cáli irículé, yá wainámi ibadápinácawa, quéwa wainá imichèeripinácawa yéetácáisi íicha, càmíirita yéewa ibadácawa. ⁴³Yá nabàliaca wainámi càliculíi irículé, chéecáisi báawéeri iicácanáwa, néese wainá icáuquèeripinácawa icànapiná mèlumèluíri iyú, cayábéeri iicácanáwa. Nabàliaca wainámi machawàaquéeri néese cachàinipinácani yái waináca imichèeripinácawa càliculíi íicha. ⁴⁴Nabàliaca wainámi, cháí èeri irícuíríca, néese wainá chènuníiséeri imichàapinácawa, iyácáiná wainá èeri irícuíri, càita nacái iyaca wainá chènuníiséeri.

⁴⁵Càité profeta itànàaca Dios itàacái bàaluité: “Idécanáamité Dios imànica wàawirimi Adán iiná, yái idàbàanéericaté wenàiwicaca, yáté Dios cáucaté imànica Adán iyacaténaté cháí èeri irícu iyúwa èeri mìnali”, íimaca yái Dios itàacáica. Quéwa máiní cachàinica Cristo íiwítáise Adán íicha, yácáiná idécanáamité Cristo yéetácawa, yáté imichàacatéwa yéetácáisi íicha yàacaténá wacáuca càmíiri imáalàawa. ⁴⁶Siùca càmíta wadèniaca chènuníiséeri iicácanáwa idècunitàacá wàyaca cháí èeri irícu. Wadèniaca èeri irícuíri iicácanáwa quéechacáwa, néese piná wadèniaca chènuníiséeri iicácanáwa. ⁴⁷Dios imànicaté cáli ichùmalé wàawirimi Adán iyú, yái asiali idàbàanéerimica. Yáté èeri mìnalicani, yái Adánca. Néeseté Cristo yàanàaca, yáté chènuníiséericani. ⁴⁸Wía iyéeyéica cháí èeri irícu, wadèniaca waináwa cháí èeri irícuíríca càide iyúwaté yái asiali iiná Dios idàbéericaté cáli ichùmalé íicha asialipiná, yái wàawirimi Adánca. Néese, weebáidacaalí Cristo itàacái wàyacaténá chènuniré, yásí wadèniapiná waináwa chènuníiséeri càide iyúwa Cristo iyáaná, yái chènuníiséerica.

⁴⁹Càide iyúwacué wadèniáná iicácanáwa yái wàawirimi Adán Dios idàbéericaté cáli ichùmalé ícha asìalipiná, càita nacái wadèniapiná iicácanáwa yái Cristo yàanèericaté chènunfise.

⁵⁰Píacué nuénánáica, nuwàwacué nucàlidaca pírí áiba wawàsi: Yái wainá idènièrica fíranáwa cháí èeri írìcu càmíiripiná yéewa iwàlùacawa Dios ìyacàle írìculé Dios icùacataléca macáita, wainá imáalàacáináwa áiba èeriwa. Iná càmìta yáalimá iwàlùacawa néré càmìcatalépináca imáalàawa. ⁵¹Quéwacué nuwàwa píalíacawa áiba wawàsi Dios ibèericaté wenàiwicanái ícha, quéwa siúcade imàacaca wáalíacawa. Wía yebáidéeyéica Jesucristo itàacái, càmìta wéetápináwa canánama, quéwa Dios iwènúadapiná wíawa macáita wàlisanácaténá waicácanáwa. ⁵²Wéemìapiná trompeta isàna, yái trompeta namáalàidáanáca canánama, yásí abéericuíseta Dios iwàlìsàidapiná waináwa ráunamáita càide iyúwa bàli íimacaalí watuí. Yácáiná wéemìapiná trompeta isàna, yásí namichàacawa càliculìi írìcuíse macái yéetéeyéimicawa yebáidéeyéicaté Jesucristo itàacái. Namichàapínacawa yéetácáisi ícha nainá wàlìsàì yáapichawa, càmíiyéipiná yèepùà yéetácawa quirínama. Yásí wíaca nacái cáuyéica Dios iwènúadapiná wíawa wàlisanácaténá waicácanáwa. ⁵³Yácáiná wainá èeri írìcuírica càmìta yéewa ìyaca càiripináta, iná iwàwacutá Dios iwàlìsàidaca wainá wadèniacaténá waináwa wàlìsàì càmíiri imáalàawa. ⁵⁴Néese idécanáami Dios iwàlìsàidaca wainá, wadèniacaténá waináwa wàlìsàì càmíiri imáalàawa, yásí wàyapiná càiwade iyúwaté profetanái itànàanáté Dios itàacái bàaluité. Náimaca: “Yái yéetácáisi idéca imáalàacawa. Dios idéca imáalàidaca wáichani, yái wàuwideca yéetácáisica. ⁵⁵Pía yéetácáisi, càmìta quirínama yéewa pimawèniadaca wía. Pía càliculìi, càmìta quirínama yéewa piùwichàidaca wía, canácáiná quirínama píiwi”, càipiná wáimaca. ⁵⁶Yái wabáyawanáca ìyaca càide iyúwa yéetácáisi íiwica, yácáiná wabáyawaná iwàlìse, iwàwacutácaté wéetáanápínacawa méetàuculé Dios ícha càiripináta. Yá nacái yái tàacáisi Dios imàaquéericaté profeta Moisés írì càicanide iyúwa idéca nacáicaalí yàaca wabáyawaná ichàini, wíacáiná wáalíacaalítéwa càinácaalí wawàsi Dios imáisanièri wamànica, néese máiníté cachàiníwanái wawàwaca wamànica wabáyawanáwa. ⁵⁷Quéwa Wáiwacali Jesucristo yéetácatéwa wáichawalíná, iná idéca iwasàaca wía ícha yái wéetáanápínacawa méetàuculé Dios ícha càiripináta; càita nacái Wáiwacali Jesucristo yéetáaná iwàlìse, Dios iyúudàaca wía ipíchaná wamànica wabáyawanáwa. Iná wàacué Dios írì cayábéeri!

⁵⁸Iná píacué nuénánáica cáininéeyéica nuicáca, cachàinicué píiwitáise, píibaidacué mamáalàacata Wáiwacali irípiná cachàiníwanái, píalíacáinácuéwa cawèníricani, yái píibaidéericuéca Wáiwacali ichàini iyú.

La colecta para los hermanos

16 ¹Siùcade nucàlidacué pírí ìwali yái ofrenda pìwacáidéeripinácuéca pibànùacaténácué plata iyúwa ofrenda catúulécanéeyéi irí, níái yeebáidéeyéica Jesucristo itàacái. Pìwacáidacué ofrenda càide iyúwa nucàlidáanáté nali áibanái yeebáidéeyéica Jesucristo itàacái ìwacáidáyaquéeyéicawa yàcalé imanùbaca Galacia yàasu cáli íinatéeyéica iyaca. ²Domingo imanùbaca semana ìwali, macáitacué pía canánama iwàwacutácué pìwacáidaca yéená yái plata peedéericuéca píríwa. Yá picùacué méetàucutani. Iná nùanàapinácaalí néré, càmitacué iwàwacutá pimichàidaca plata picùacaalícué méetàucutani semana imanùbaca. ³Néese nùanàapinácaalí néré, yásí nubànùaca wenàiwica natécaténá plata Jerusalén ìyacàlená nérépiná, cawinácaalí wenàiwica peedéeyéicuéca pèewísewa natécaténá piasu ofrenda néré. Yá nubànùapiná náapicha cuyàluta nali níara yeebáidéeyéica Jesucristo itàacái ìyéeyéica Jerusalén ìyacàlená irícu, natàidacaténá nía cayába níái péenácuéca pibànùeyéipinácuéca néré. ⁴Nuínáidacaalíwa cayábacà nùacaalíwa nacái, yásí nàacawa núapicha.

Planes de viaje de Pablo

⁵Nùapinácuéwa píatalé, yá iwàwacutá nuchàbaca Macedonia yàasu cáli néenibàa. Nudécanáami nuchàbacawa néenibàa, yá nùanàapinácué pìyacàle néréwa Corinto ìyacàlená néré. ⁶Cawàwanátacué nupáchiaca píawa achúma èerita, càmicaalí càì, yá nùyapinácué píapichawa uniabépinama. Néese píalimápinácué piyúudàaca núa nùwacáidacaténá wawàsi numàluwepináwa alénácaalí iwàwacutápiná nùacawa. ⁷Càmitacué nuwàwa nupáchiaca pía maléená èeri meedá, néese nuwàwacuéca nùyaca píapicha madécaná èeri Wáiwacali imàacacaalícué nùyaca píapicha. ⁸Quéwa nuyamáapinácaawa cháí Efeso ìyacàlená irícu àta judiónái imànicatalépináta nàasu cultowa ípidenéerica Pentecostés. ⁹Nuwàwa nuyamáacawa quirítàacáwa cháí, nàyacáiná madécaná wenàiwica iwàwéeyéica yéemíaca Jesucristo iináwaná ìwali, íná nuíbaidacáwaca cháí Wáiwacali irípiná, éwita nàyacáaníta nacái

madécaná wàuwideca, cà míiyéica iwàwa nuéwáidaca wenàiwica Dios itàacái iyú.

¹⁰Timoteo yàanàacaalícué pìatalé, pitàidacué cayábani casfímáicaténá iwàwa píapichacuéwa. Pimànicué irí cayábéeri íibaidacáiná Wáiwacali irípiná càide iyúwa núa. ¹¹Iná piicácué píichawa cayába ipíchaná abéeri péenácué caná iwèni iicáca Timoteo. Néese piyúudàacué Timoteo yàasu àyapu ìwali yàanápínáwa matuíbanáiri iyú nùatalé, nucùacáiná yàanàaca náapicha níara áibanái wenàiwica yeebáidéeyéica Jesucristo itàacái.

¹²Néeni, nudéca nusutáca wawàsi manuísíwata wéenasàiri Apolos fícha yàanápínácué ipáchiaca pía áibanái wéenanái yáapicha. Quéwa siùca càmitàacáwa iwàwa yàacawa. Néesecáwa ipáchiapínácué píawa idèniacatáita wawàsi.

Saludos finales

¹³Piicácué píichawa cayába. Peebáidacué Jesucristo itàacái tàì fíméeri iyú mamáalàacata. Picácué cáalu pía, néese píináidacuéwa cáiwitáiséeri iyú càide iyúwa béeyéi asianái. ¹⁴Macáita yái pimàníricuéca, pimànicué cáininéeri iyúni, piyúudàacaténácué áibanái.

¹⁵Siùcade píacué nuénánáica, píalíacué naináwaná ìwali níara Estéfnas yéénánáica iyéeyéicuéca píapicha. Níacata idàbánéeyéicaté yeebáidaca Jesucristo itàacái Acaya yàasu cáli íinata. Yá nadéca namàacaca níawawa Dios irí nayúudàacaténácué pía, píacué yeebáidéeyéica Jesucristo itàacái. ¹⁶Nuwàwacué pimànica càide iyúwa nàalàanácué pía, níái Estéfnas yéénánáica, cawinácaalí nacái inacáiyéica iyúudèeyéica wenàiwica, íibaidéeyéica nacái Wáiwacali irípiná.

¹⁷Casíimáica nuwàwa níacáiná áibanái péenácué nadéca nàanàaca nùatalé, níái Estéfnas, Fortunato nacái, Acaico nacái. Nadéca namànica nulí cayábéeri cà míiricué píalimá pimànica canácáinácué pía núapicha. ¹⁸Nadéca nachàiniadacuéca piwàwa, nuwàwa nacái. Iwàwacutácué piicáca cáimiétaquéeri iyú macái wenàiwica iyéeyéica càide iyúwa nàyáaná.

¹⁹Nawàwalicué pía níái ìwacáidáyaquéeyéicawa yàcalé imanùbaca cháì Asia yàasu cáli íinata, níái yeebáidéeyéica Jesucristo itàacái. Yái Aquila, úái nacái yàacawéetúaca Prisca nawàwalicué pía manuísíwata Wáiwacali íipidená ìwali, náapicha macáita ìwacáidáyaquéeyéicawa nacapèe irìcu namànicaténá culto. ²⁰Macáita wenàiwica yeebáidéeyéica Jesucristo itàacái cháì nawàwalicué pía. Pitàidáyacacuéwa cayábéeri iyú.

²¹Núa Pablo nutànàacué pírí yái achúméerfina tàacáisica nucáapi iyúwa nuwàwalicáinácué pía.



²²Aibanáicaalí càmita cáininá iicáca Wáiwacali Jesucristo, Dios yùuwichàidapiná níawa. ¡Pía, Wáiwacali, pìawa síisaara caqualéta!

²³Nusutácué Wáiwacali Jesucristo ícha pirípinácué imànínápinácué pírí cayábéeri mawèníri iyú. ²⁴Nuwàwalicué pía manuíswata cáininácaína nuicácuéca pía Cristo Jesús ìwalíise.